





711
715.5

PAEDOLOGIA

PETRI MOSELLA-
ni Protegensis. Dialogi

XXXVII.

DIALOGI PVERILES CHRISTO-
phori Hegendorphini, XII.



PARISIIS,

Apud Hæredes Mauricij à Porta, in clauso
Brunello, ad D. Claudij insigne.

1 5 5 7.

11

11

11

11

11

11

11

11

Petrus Mosellanus Io-

HANNI POLYANDRO

LYPSIAE, APVD DIVVM

Thomam Ludimagistro

suo S.



S tu quidem mi Ioānes iam annos multos re ipsa expertus, quanta cum difficultate, & quā serò, infirma puerorum ætas, ad Latinitatis antiquæ imitationem perueniat. Nam cum post prima rei Grammaticæ Rudimenta, tenera ingenia statim ad Latini sermonis vsum adigantur, nec tamen vlla eis via ad hanc rem demonstratur, sit, vt dum vtcunque quod iubentur, præstare conantur, nouam quandam loquendi rationem planè barbaram, & per vernaculi sermonis vestigia ingredientem inter se sibi ipsi confingant. Quod vitium rudibus animis, & per hoc tenacioribus primùm impressum, poste nulla arte deleri potest. Atque hæc causa mihi videtur, quòd non Germani solùm, sed & Itali, qui nobis hac parte sceliciores videri volunt, sermone quotidiano immundo adeò & parum proprio vtuntur. Videas enim bonam partem eorum qui hodie lin-

quam Latinam profitentur, in loquendo nihil minus spirare, quam nativum illum & incorruptum Romani sermonis odorem, ut candidissimæ eloquentiæ scriptor Fabius de extemporali orationis facultate frustra scripsisse videatur. Quid, quod hoc malum grauioris etiam ætatis profectibus omnem aufert gratiam? Alioqui qua causa malè audiūt apud Quintilianum & item Gellium *ἡλικίῃς*, nisi quod à teneris, ut aiunt, vnguiculis, optimis non sunt adfueti? Obuia quæque in authoribus citra delectum, in suum vsum conuertunt, ut dictio eorum omnis non propria, & domi suæ nata, sed è variis scriptoribus, ostiatim quasi mendicando congesta, delicati iudicij hominibus non possit non putere. Hæc quum tu non minus acutè, quam grauiter perpenderes, nihilque haberes potius, quam puerorum, qui tuæ fidei sunt concrediti, rudem & ad omnia sequacem animum ad optima quæque perducere, mecum egisti sæpè, ut loquendi formulas aliquot, quibus ea ætas vni posset, conscriberem. Diu, ut nosti, sum reluctatus, partim quod ipse grauioribus occupatus hanc operam utilissimam quidem illam, sed in speciem tamen humilem, & penè sordidam dedignarer: partim quod quia in ludis eiusmodi ipse non admodum essem versatus, vix possem eam quasi personam cum decoro gerere: videbam enim ad hanc fabulam agendam opus fore denuò repuerascere: & ut ait Flaccus, Ludere par impar, equitare in arundine longa. Sed cum tu rogādi finem faceres nullum, pariterque te, qui probè puero

rum sensum calleres, siqua nobis hac parte de-
essent, suppleturum promitteres, volui quanvis
calumniam subire potius, quàm vel tibi amico,
tum synceriter amanti, tum prudenter roganti,
quicquam negare, vel meo pudore publicū pue-
ritiæ commodum diutius remorari. Iam siquis
est qui vehementer putet indignum has, sicuti
prima fronte videntur, nugas in chartarum per-
niciem scribi, is mihi virum paulisper exuat, & in
puerum redeat, cogitétque iam primùm sibi La-
tini sermonis vsum discendum. Statim opinor
videbit, quàm facilè, & nullo penè negotio per
eiusmodi fabulas, velut quosdam gradus, ad Te-
rentij proprietatem, ac Ciceronianam facilita-
tem prima illa ætas traduci potuisset. Quis au-
tem laturus esset, immò quis non statim exhibila-
turus, si ex puerili persona tetricam istam senum
sapientiam sonarem? Tametsi sunt his nugamē-
tis nostris admista quædam, quæ seria docere vi-
deri possint, vsqueadeo vt & hoc nomine ab A-
ristarchis istis vix tutus sim futurus. Sed malui
ego decori paulisper oblitus, paucula subinde
aspergere: quæ si pueris suis literatores præle-
gant attentè, queât cum studiorum abusum tol-
lere, tum pueritiæ mores ad Christianam regulā
corrigere. Hos labores tibi mi Polyander, dicare
volui nominatim, vt qui author nobis & adiu-
tor ad hęc scribēda fuisti, idem quoque suscipias
quicquid id est libelli, tua facundia, autoritatē
ac gratia tuendum. Quòd si ex hac editione ad te
impulso rem, & me scriptorem, aut nulla, aut te-
nuis admodum gloria redibit, solemur nos ipsi

per hoc, quòd nullo popularis auræ pruritu, sed pio & simplici animo vterque nostrum hoc negotium tractauimus: tu adhortando, & ego scribendo. Siquidem iuuare studuimus saltem aliquos, nocere nemini. Bene vale. Lipsiæ, ipsis feriis diui Matthæi apostoli. Anno

M. D. X V I I.



DIALOGVS I. GASPAR ET

MODESTVS DE NUN-

dini fabulantur.

G A S P A R.



GE verò Modeste, quot dies hinc absunt nundinarum feriæ, quibus frequentes adeò huc peregrini adueniunt mercatores? M O D. Dies, ni fallor, quatuordecim: nam accuratè singulas penè horas ad calculum vo-

co: siquidem nullum tēpus totius anni cupidius expecto, quàm nundinarum. G A S P. Non iniuria: quandoquidem hæ feriæ partim nuntios, partim literas, partim omnibus literis gratiores pecunias nobis apportant. Quòd si non & mihi iam planè exhausto, proximæ nundinæ argenti subsidiū attulerint, nō potero hīc diutius durare. M O D. Pecunias quidem, id quod satis scio, accipiam nullas: pannum tamen in vestem hybernā, se discedenti mihi missurum promisit pater. G A. Utinam uterq; voti compos fiat, ut & tu cōmodius vestitus, & ego numatior, vrgentis hyemis iniurias minori negotio propulsare queamus.

a iiij

DIALOGVS II.

*De natali celebrando, de receptis pecuniis, deque
bono cuiusque Genio.*

OSVALDVS ET MICHAEL.

NON tu hodie tuum natalem celebras, atque nos tuos sodales conuiuio excipis? An ignoras hunc diem diuo Michaëli, cuius tu nomen refers, esse sacrum? **M I.** Scio equidem: quid autem facerem, quando ne obolum quidem habeo quo panem emere queam, nedum conuiuia agitare? **O S.** Non his nundinis à parentibus tibi numi sunt missi? **M I C.** Sunt utique, sed ante nundinarum exitum à mercatore, qui literas modò dedit, extorquere possum nihil. ait enim sibi in tanto hominum strepitu, otium ad numerandas pecunias non esse: alioqui non modò natalem meum conuiuio exciperem, sed & Genio bono (quem angelum dicimus) peculiari aliqua hilaritate gratificarer. **O S.** Itaque Terentiano illo satis excusati sumus, Vt quimus, aiunt: quando, vt volumus, non licet.

DIALOGVS III.

De reditu in patriam, de literis à parentibus acceptis, deque missione flagitanda.

PETRVS ET PAVLVS.

SALVE mi Paule. **P A V L.** Et tu sodalium iucundissime Petre. Sed quid adeò es tristis? nam ex quo communia studia, idémque hic ludus, mutua nos familiaritate iunxerint, vultu alacri, &

festiuo mihi semper es visus, vt ex iis, quos hic habet lusus, fuerit nemo qui non te familiariter vti concupiuerit: nūc nescio quomodo alius vidēris. **P E T.** Et mirū tibi videtur, si vultu sum tristi, cum eiusmodi quiddam mihi accidat, quod studiorū meorū progressum nō parū queat remorari? **P A V.** Quid illud quæso? Nam graue aliquid sit oportet, quod te adolescentem constantem à studiis deducat. **P E T.** Dicam paucis. Iam annus ferme est, ex quo ludi huius nostri celebritate excitus, huc, ad capiendum ingenij cultum, cōcessit: quo tempore, studiorum meorum vix rationem inueni, cum mihi è patria offeruntur literę, quę me domum, quasi ex medio studiorum cursu reuocant. Et quod me omnium maximè malè habet, reditus mei causas non ædunt. nec scire possum, an huc tandem liceat remigrare. **P A V.** Quī scis an ad fortunam, aliquam auoceris? **P E T.** Nulla mihi fortuna potest incidere tanta, cuius respectu literas queam posthabere. **P A V.** At parentibus est obsequendum. **P E T.** Hoc illud est quod me mouet, quod me hinc domum extrudit. Alioqui tãtetsi non tātum est æris, quòd hanc hyemē transmittere queā: tamen præ studiorū amore, victum mendicando ostiatim quæritassem. **P A V.** Num antequam hinc abeās, nunquam forsan rediturus, conuiuium inter nos agitabimus? **P E T.** Conuiua agitare, qui ad supellectilis meæ sarcinam componendam vix tempus habeo? Imò iam rectà ad Ludimagistrum pergo, missionem efflagitaturus: quam vbi fuero consecutus, cōterraneorum meorum literis, quas ad parentes suos mihi

dabunt, acceptis, statim iter ingrediar. Quare rectissime vale mi Paule, mutæ nostræ consuetudinis memor. Quod siquando dabitur otium, fac de studiorum tuorum ratione, & ludi huius statu me literis tuis certiore reddas. P A V. Faciam sedulò mi Petre, & lubēs quidem. Sed heus tu. P E. Quid est? P. Conterraneos tuos, quorum consuetudo, dum hîc erant, vtrique nostrum erat grata, meo nomine diligenter salutes velim. P. Sat est, faciam.

DIALOGVS IIII.

De conueniendi præceptore, missione impetranda, deque gratiis præceptoris agendis.

PANDALVS PETRVS ET LVDIMAGISTER. PAND.

Q Vis es, qui trepidè adeò pulsas ostium? En Petre, tun' pulsasti? P E T. Pulsaui. P A N. Sed qua gratia huc intromitti postulas? nō vt magistrū conuenias? P E T. Maximè: si est intus, habeo quod cū eo agā ipse. P A N. Est intus. Sed mane paulisper, dū huc tibi renūtio, an hoc tēporis articulo, ei te audire vacet. Here, scholasticus quispiā foris expectat, qui, si nō sit molestū, cupit te de re quapiā cōuenire. L V D. Quin huc adest? P A N. iam iam aderit. P E T. Salue præceptor optime. Auocor hinc in patriā seriis parentū meo-

rum literis: & si non auocarer, ipsa tamen æris egestas, & item nuditas, domum abigere me possent. Itaque gratias ago tibi immortales obseruatissime præceptor, quod me primùm in tuam disciplinam humanissimè recipere dignatus es: deinde, ex quo tuæ scholæ fui sectator, & fideliter & accuratè tam literis bonis, quàm rectis moribus expolire studuisti. Porro quia, ut dixi, non amplius hîc morari licet: quàm possum, amanter oro, ut qua humanitate me hætenus tractasti, eadem & migrandi potestatem concedas. Etenim, si modò id pace fiet tua, cras prima luce iter sumus ingressuri. **LVD.** Siquid feci, quod gratum sit adolescens studiose, hoc totum non mihi, sed præceptoris officio feres acceptum. Cæterum, quâdo te hinc parentum literis auocari dicis, abi me permittente bonis auibz quocunque te vel parentes vocant, vel rectius forsan consilium hortatur. **PETR.** Sed illac quâ iter sum facturus, amicisne aliquos habes quos literis salutare cupias: quandoquidem ipse perferendi onus in me lubens recipio. **LVDIMAGI.** Non admodum: & ut maximè haberem, tot tamen aliis negotiis in præsentia districto, scribere non vacaret. Quare tu, quod ad literas attinet, securus iter destinatum quando lubet, capesse. **PA.** Bene vale.

*De excipiendis scholasticis aliunde aduenientibus, de-
que Græca literatura rudimentis in
prima ætate addiscendis.*

MARCUS ET IOANNES.

VNde nobis aduenis mi Ioannes? aut quo ani-
mo huc ad nos es profectus? Neque enim o-
pinor ludi huius gratia venis, qui antè tot
meis atque item aliorum literis inuitatus, huc per-
trahi non potuisti. **IOANN.** Imò hac ipsa cau-
sa adsum. **MARC.** Vt cunque sit, gaudeo te fe-
stiuissimum sodalem nobis redditum. Et hic ad-
uentus tuus non mihi solum, sed omnibus, qui
te norunt, optatus est. Sed enim aperias oro, quid-
nam sit illud quod te tandem huc allexerit. **IO.**
Vis scire? **MARC.** Volo. **IOANN.** Audies.
Quum primum puber factus, grauiori paulò cu-
ra præceptorem scriptores Latinos prælegentem
audire cæpisssem, subinde Græculæ aliquot voces
nobis occurrebant, quo loco præceptor suo mu-
nere egregiè se putabat perfungi, quoties obiter
tantum admoneret, esse ea Græca, perinde ac si
peregrina, ad nos nihil attinerent. Hic quid aliis
audientibus in mentem venerit nescio: equidem
sic cogitabam. Si ad nos hæc non pertinent, ut nec
cognita doctum, nec incognita imperitum reddat,
cur non ex libris tanquam offendicula. quædam
penitus eradimus? Deinde mirabar veterum scri-
ptorum penè omnium curiositatem, qui non so-

lùm magna cura peregrinas istas nugas didicissèt, sed & libris suis velut maculas quasdam inspersissent. Postremò quanquam à præceptore liberè dissentire erat religio, tamen cùm audirem esse viros graues multos, qui has, sicuti tum putabatur, nugas amplectarentur profiterenturque: paulatim circumspicere cœpi, vtrùm credere malletm; magistrùmne meum potius ignorantia labi, an totam semel antiquitatem, & ex recentioribus optimos quosque pueriliter delirare. Itaque sic mihi inter hæc fluctuanti, & in quam partem inclinarem hēsītāti, fortè fortuna cecidit, vt Marci Tullij Ciceronis libros de Officiis enarrādos præceptor susciperet: in cuius lectionis ingressu statim in ipsa præfatione grauissimus ille & philosoph⁹ & orator, vnico suo filio suadet vt Græca cū Latinis cōiungat, quò par sit in vtriusque orationis facultate. Hoc vbi, præceptore dissimulante, mihi arripuissēm, grauiter dolere cœpi negatam nobis occasionem eas literas discendi, quarum studiū, si essent inutiles, nec laudaret Cicero, nec filio vnico iniungeret prudētissimus pater. M A R. Iam video quò tendas. I O H A N. Mane, nondum omnia habes. Cùm hæc subiratus mecū agitarē, ecce rumor apud nos increbrescit, in hanc laudatissimam Academiam Principis munificētia accercitos, qui publicè Græcas literas doceant & ex eorum velut fontibus nōnihil quoque in ludū literarium deriuari. Hæc fama partim literis, partim commeantibus confirmata, illinc me vtriusque eruditionis cupidum exciuit, & huc appulit. Habes cur aduenerim, nimirum vt in hoc vestro lu-

do & Græcæ linguæ elementa saltem liceat percipere. **MARC.** Dubio procul voti compos eris, neque aliquò aliò foelicius te conferre potuisses, adeò hîc omnia nobis sunt commoda. Denique, quod peculiariter ad rem pertinet, ludus, si ququam alibi, instructissimus. **IOHAN.** Sed quando satis fabulati sumus, hanc operam non negabis opinor, vt me ad ludi moderatorem deducas: siquidem iam statim nomen in hanc literariam militiam dare sum paratus. **MARC.** Faciam, ac lubens: tu me sequere.

DIALOGVS VI.

De recipiendis in disciplinam scholasticam.

**MARCVS LVDIMAGISTER ET
IOHANNES. MARC.**

EN tibi præceptor optime, adduco hîc quendam, cum quo iâ annos aliquot mihi fuit familiaritas, hominẽ bonũ & studiosum: is tui ludi fama excitus huc appulio. Quare magnæ foelicitatis loco ducet, si se in tuorum gregẽ recipere dignatus fueris. **LVD.** Adolefcẽs bone, quod tibi nomẽ est? **IO.** Est mihi nomẽ Iohannes. **LVD.** Faustum planè nomẽ es sortitus: quippe hoc Hebræis à gratia dicitur. Quamobrem summa ope tibi est enitẽdum, vt tam gratiosi nominis expectationi, pro tua virili respondeas. **IOHAN.** E-

quidem pro viribus sedulò dabo operam, téque in hoc mihi adiutorem fore spero. **LVDIMAGISTER.** Sed & ipsa corporis tui facies animum subesse ostendit: qui neque à literis, neque virtutibus abhorreat, adeò vt si fortiter egeris, & de te dici demum possit illud, Grator est pulchro veniens è corpore virtus. Quò libentius te in meam disciplinam recipio, si modò das fidem te boni discipuli officio apud me functurum. **IOHAN.** Do fidem me in omnibus, quod rectū erit, quódque tu iusseris, facturum. **LVDIMAGI.** Ita spero quidem. Sed quæ tibi est patria? vt in rationarium hoc quoque adscribam. **IOHANN.** Patria mihi est Auba, oppidum Franciæ Orientalis, non procul ab Herbipoli, celebri sacerdotum sede, situm. **LVDIMA.** Sat habeo: quod superest, curabitur tibi pro tua sorte commoditatéque domicilium. Ac tu quidem in eo sic te gere, ne aliqua macula hinc in nostram scholam redundet. **IOHAN.** Quod ad hanc rem attinet, securus esto optime præceptor: nam, vt inquilinum decet, modestissimè agam. Nunquid aliud mihi vis iungere? **LVDI.** Nihil: nam siquid superest tibi præstandum, quotidie inter prælegendum à nobis dicetur.

DIALOGVS VII.

*De domicilio commodo atque incommodo, de-
que paupertate ac opulentia
scholasticorum.*

IOSEPHVS ET CLEANTHES.

Quid agitur mi Cleanthes? Contigitne tibi commoda habitandi ratio? aut adhuc incertis sedibus oberras? **CLE.** Contigit quidem habitaculum, sed eius commoditas tanta non est, quantam fore asperaui: siquidem spes erat fore, ut ciuis alicuius beneficio vnà cum domicilio & victum qualencunque nanciscerer. verum multò aliter euenit: nam vix impetrare potui, ut pro locario statuto mihi angulus in ludo locaretur: victum verò, quando pecuniæ est parum, ostiatim emendicari oportebit, nisi fortè melior mihi fortuna posthac obuenerit. Tu autem fœlix es mi Iosephe, cui parentes tantum sumptuum suppeditare sufficiunt, quantum ad studiorum commoditatem est satis. **IOS.** Est, deo gratia, vnde hæc commoda mihi parem: sed quo plura mihi sunt ad disciplinas parandas commoda, eo ipso grauiori dignus essem odio, si nō plus quàm vestrum quispiam didicero. Attamen nec vos de mediocri studiorum vestrorum profectu desperare decet: quandoquidem constat multos humili natos loco, adhæc nullis omnino fortunæ dotibus adiutos, ad eruditionis fastigium ascendisse. An non Democritus ille physicus ex baiulo factus est philosophus? Non Cleanthes, cuius
tu no-

tu nomen refers, a quis noctu hauriēdis diurnum victum sibi quæsiuit? & quem Stoicum hic non æquauit? Sed & Plautus inter ipsos pistrinæ molestos labores, laudatissimas illas comœdias conscripsit. CLE. His & eiusmodi aliis exemplis animatus in studiis perseuero: alioqui me iampridē ad manuarium aliquod artificium transtulissem. Quanquam sunt mei ordinis plerique adolescētes in ludis magis putrescentes, quàm studentes, adeò infœlici ingenio, vt ad nullas literas sint appositī: hi mihi nulli alij vsui esse videntur in ciuitatibus, quàm quòd alios mendicos, dum eis panem præripiunt, ex vrbibus pellunt. Iis ego confulerem, vt se ad aliquod aliud studium applicarent. IOS. Probè dicis mi Cleanthes: nam si omnes eiusmodi essent ingenio præditi, quali tu, fouendos modis omnibus putarem. Certè, quod ad te attinet, spero propediem tibi meliorem fore conditionem, nempe vt apud ciuem quēpiam, cui nonnunquam inseruias, omnem studiorum commoditatem sis habiturus. CLE. Utinam Deus ita faxit. IOS. Faxit, ne dubita, & in hoc mea commendatione iuuabere.

DIALOGVS VIII.

De vindemia & occupio loquuntur.

ANDREAS, PHILIPPVS.

Vtinam mi Philippe iam domi apud parētes ageremus. PHIL. Quid ita? A N. Rogas? imminet iā vindemiæ tēpus, quo nullū toto anno

B

noſtratib' accidit lætius. P. Quid ego audio? tunc ſimul vinitorem vis agere, & literarum cultorẽ?

AND. Animi cauſa racemos decerperemus, deguſtaremus è lacu muſtum: neque enim diutius abeſſe optarem, quàm muſtum in dolia cõditum deferbuiſſet deſpumafſetque: adhæc decoquemus ſapam, deſrutũ, ac vini veteris ſæcem. Quid, quod nobis liceret & aucupio voluptatem quæ-
rere? ſiquidem volucres captaremus iam retibus explicatis, iam pedicis fixis, nonnunquam verò & viminibus viſco illitis. PH. Sine parentes harum rerum curam gerât: tu, ſi ſapis, in literis te oblecta. AND. Atqui audiui magnos viros in eiufmodi ruſticis rebus oblectationem quæſuiſſe.

PHI. Rectè, quando magnis viris hæc ſunt permittenda, nobis verò qui nondum vltra primas literas progreſſi ſumus, non itidem. A. Semper tu quidem meis affectibus obſtrepis, non minus quàm præceptor. P. Quod ad te attinet, age, age vt lubet: me certè non habebis huius tuæ ſtultitiæ comitem.

DIALOGVS IX.

De authoribus proximo ſemeſtri in ſchola prælegendis.

THOMAS ET HIERONYMVS.

QUID eſt quod illac venis Hieronyme? aut vbi fuiſti? HIEON. Redeo à præceptore eo, qui à ludimagiſtro primas tenet. THOMAS. Age, quid is narrat de au-

thoribus hoc semestri prælegendis? iam enim, sicut opinor, eorum delectum habuerunt. **H I E.** Habuerunt, idque sicuti dici audio, prudenter: nam prætervtriusque linguæ rudimenta, ex Fabii præscripto coniunctim tradenda, primùm Terē-tianas comœdias exponendas susceperunt, quòd hic scriptor ex Latinis penè solus Romani sermo nis natiuam & genuinam proprietatem retineat, adeò vt nec Marcum Tullium, oratorum principem puduerit ad huius exemplum orationes suas formare: deinde Marci Tullii officia, quòd is liber non linguam solum eloquentia expoliat, sed & pectus rectis moribus instruat: vnde & Plinii iudicio non legendus, sed ad verbum sit ediscendus. Postremò aliquot Virgiliani poëmatis libri exponentur, nempe vt Augustini iudicio, optim' poëta teneris animis infixus, in omnem vsque vitá hèreat, Adhęc, quando parum est æquū Christianos in gētiliū libris esse totos, eis diebus quibus ferias agimus, elegātissimos simul, & grauissimos hymnos Aurelii Prudentii grauis & sancti viri audiemus: aut si displiceant, Enchiridion militis Christiani, ab Erasmo Roterodamo accuratissimè elaboratum. Quæ si (vt spero) & pro suo officio explicarint accuratè præceptores, & nos pari diligentia exceperimus, non opinor malè hoc semestre nobis fore collocatum. **Т Н О М.** Non iniuria hunc laudant delectum mi Hieronymē: neque enim vnquam eorum mihi placuit institutū, qui his, & id genus aliis optimis scriptoribus posthabitis, in Apuleio, Capella, & eius fari nē authorib' cēteris bonas horas malè collocant,

qui scriptores Ciceroniana eloquentia non contenti, sibi solis nouam dicendi rationem inueniunt, quasi non summum sit orationis vitium à communi dicēdi consuetudine abhorrere. Nam qui citra delectum Catullos, Tibullos, Martiales, & eiusmodi enarrant, & per hoc discipulos peregrina & prodigiosa docēt vitia: hi mihi non verbis, sed verberibus coërcendi videntur. Hi enim sunt illi poëtæ, quos solos è republica sua pellendos statuit Plato. Atque hæc non ex me dico, sed quòd sic censentes audiuerim doctissimos pariter & integerrimos viros. **HIERONY.** Rectè ergo facit ludi noster magister, qui eiusmodi nihil in scholam suam irrepere sinit. Sed ego iam rectà hinc bibliopolium concedam, libros de quibus dixi, coëempturus. **THO.** Nostin' quanti hæc simul emi possint? **HIERON.** Haud dum licitatus sum: opinor aureo numo: siquidem audio indicari argenteis vigintiquatuor. **THOM.** Bene habet, quòd non pluris venduntur: alioqui, quæ mea est egestas, coëmere non suffecissem. **HIERON.** Eamus ergo. **THOM.** Quando vis, in me non est mora.

DIALOGVS X.

De relegenda prælectione, de ediscendo, deque enotando ex auctoribus loquendi formulæ PHÆ-

DRVS & ætate & eruditione

maior cum fratre suo IO-

HANNE lo-

quitur.

Quid tu otiosus hîc desides, & non potius prælectionem modò auditam relegis? **IO-**
HAN. Relegi, atque adeò bis terve. **PH.**
 At fortasse non satis accuratè. **IO.** Accuratissi-
 mè, vt totam etiam memoria complectar. **PHÆ.**
 An tuo te officio satis perfunctum credis, si me-
 moria tantùm teneas, & plittaci more, verba non
 intellecta præceptoris reddas? **IOHANN.** Quin
 intelligo omnia. **PHÆ.** Hui omnia! vide quid
 dicas. **IOHANN.** Omnia inquam, vt maximè
 tibi videatur incredibile: atque id vt credas faci-
 lius, liberum tibi est singula quæ ad modò audi-
 tam prælectionem attinent, ex me perquirere.
PH. Singula persequi in præsentia non est ostiû:
 hoc tantum quærø, primùm an totam auctoris
 sententiâ ex præceptoris interpretatione sis asse-
 cutus, & qua quidque ratione quòve consilio sit
 dictum, intelligas. Deinde singulâsne clausulas
 expendis: videlicet siquam habeat sententiam
 insignem, siquod prouerbum, siquod σχῆμα, si-
 quem tropum, siquem colorem rhetoricum, si-
 quem locum dialecticum, siquas venustè loquē-
 di formulas. quæ omnia enotare operæpretium
 est, partim vt sit in promptu semper quo mores

nostros pariter & alienos corrigamus, partim ut ex idoneis scriptoribus suppetant rectè loquēdi scribēdique exempla: ad quæ crassissima illa hodie barbarissantium loquēdi consuetudine posthabita, orationem nostram componere queamus. Postremò siquod dictum antiquè, siquod nouè, quod loquēdo, siquod parum Christianè, quod viuēdo exprimere non cōueniat: hæc magister tuus, vir nō solū doctus, sed & prudens inter prælegēdum diligēter admonere solet: & ipse eiusmodi, cum id ætatis eram in scholis non oscitāter excepta domum regressus, partim memoriæ, partim chartis, fidis memoriæ custodibus commēdabam, sensi nāque hac diligētia me vehemēter proficere. quod si fratris vestigiis insisteres, idēque faceres, iam nō hīc, sed libris adsideres. IOANN. Nimis multa in puero requiris. Equidem, ut quod verum est, tibi respōdeam, in his quæ tu mones exponēda, plerique omnes sumus negligētiore: nimirum cōtēti singularum dictionum quæ in cōtextu reperiātur, respectum habuisse: videlicet quam ex octo orationis partibus habeant pro genere, quæ sint accidētia, cuius generis, simplicia sint an cōposita, in quam cadāt declinationem: item quæ partium sit inter sese cōstructio. PHAED. Rectè, sed & illa nō oportet negligere: alioqui non video quid referat Terentium, Ciceronem, Virgilium, & similes tanta cura sine fine tractari, si non inde aliquid quod vel ad rectè viuēdirationem, vel dicendi facultatem faciat, cōsequamur. Ipse certè eam lectionem, ex qua auditorum imi-

tationi nihil accedit, nullam puto: tantum abest ut istos probem, qui scriptorum sensum exposuisse utcumque contenti, nullam imitandi viam discipulis commonstrant. Tu verò quando præceptorem nactus es doctum & fidum, fac eius tum doctrinæ, tum fidei, diligentia tua respondeas.

IOAN. Dabo operam sedulò, ne quod ad hanc rem attinet, iure me posthac obiurgare queas. sed iam duodecimæ horæ signum auditur, quare hinc ocyus in ludum contendam.

DIALOGVS XI.

Complectens formulas loquendi de feriis.

STEPHANVS ET LAVRENTIVS.

Quem aiunt hodie apud populum in templo nostro concionaturum, mi Laurèti? LAV. Audio quempiam è monachis in suggestum proditurum. STEPH. Miror non insignem aliquem theologorum ei negotio adhiberi, maxime cum ingens hominum turba hodie in hanc ædem confluat: propterea quòd sacrificus quidam nuper in sacerdotum ordinem assumptus, primum sacra faciet. LAV. Et mihi mirum videtur: quanquam quod ad me attinet, vellem concio quam breuissima haberetur. Etenim iam nunc vehementer esurio, biduano iam penè ieiunio maceratus. Nam his diebus, quibus à carnibus abstinetur, nunquam ab eo rectè satur. STE. Duas adhuc horas edendi aviditas tibi est reprimenda: siquidem præter concionem, quæ horam

poscit, scis quantum temporis in summo sacrificio Choraula sibiumat, quem etiam penè superant hæ nostræ cantiones supra modum prolixæ. **LAV.** Malè sit istis, qui harum rerum nobis sunt authores. Ipse certè statim, ubi peractum fuerit sacrum, ad diuitum ostia citato adèdò cursu contendam, ut si non in primis, secúdis saltem & tertiis stipem accipiam. **TE.** Sed me vix anteuertes. **LAV.** Res ipsa indicabit.

DIALOGVS XII.

De die à feriis secundo, quem Martii vocant, confabulantur.

CLEMENS ET REMIGIVS.

VÆ nobis mi Remigi, vltra præscriptum dormiuimus. Iã enim sol vndiq; plena resplêdet, ut septimæ horæ signum datum liceat conicere. **REM.** Non opinor: cælum aliqui præter morem est serenum, etiam si alias hoc die somnolentiæ meæ pœnas non rarò dedi. **CLE.** Vtcunque sit malè metuo mihi à ferula: quare occasionem aliquam, qua hodie è scholis emanere liceat, quæram. **REM.** Quam eam? **CLE.** Scis quid à nobis hæri contenderit hera nostra? **REMI.** Scio, nempe ut familiam hauriendis aquis iuueamus. **CLEMEN.** Sed quid tum? **REM.** Hæc erit rima satis idonea, per quam elabamur: quamobrem tuum erit, ubi octauæ signum auditum fuerit, quasi è mediis laboribus in

ludum ingredi, atque à præceptoribus emanendi copiam poscere, hac ipsa, quã dixi, causa assignata. C L E. Vereor ut procedat commetum: quandoquidem hoc die funus magnificum est deducendum, & defuncti manibus parentandum; vix facultatẽ hanc dabit, & alioqui pauci iam adsunt qui pompam instruant. R E M. Tentandum est, vtcunque res exeat: ac nescio quomodo hac die mihi semper inuisum est scholas, adire, nõ minus quàm si in pistrinũ aliquod mihi sit redeundum. Credo quòd pridiani otij sensus adhuc reliquus sic reluctantem faciat.

DIALOGVS XIII.

De nuptiis, balneo, ac visitationibus.

BVRCHARDVS ET ALBINVS.

NVptias hodie futuras aiunt Albine: tu quippiã ea de re audisti? A L B. Audiui. B V R. Dãda est opera, ut & nos è nuptialibus cibis aliquid acquiramus. A L B. Quod ad cibũ attinet hodie nihil moror: heri enim mihi prospexi, vnde hũc diem commodẽ liceat trãfigere. sed quòd à prædicio saltationẽ in theatro spectare nõ possum, hoc verò est quod me malè habet. B V R. At quid vetat quo minus spectes? A L B. Ignoras forsan in hunc diem nobis pij cuiuspiã beneficio balneas gratuitò cõdictas, à quib⁹ abesse, saltationis spectandæ studio, an tu putas fore consultum? B V R.

Vide, nisi submonuisses, egregiè fuisset oblitus: neque venisset in mentem viscerationis, quæ & ipsa in hodiernum diem est constituta. Valeant nuptiæ cum sponso ac sponsa: nos quæ propius ad nos pertinent, curemus.

DIALOGVS XIII.

De ingenij præstantia contendunt.

XYSTVS ET ALEXANDER.

FOELIX tu quidem es mi Alexáder, cui ingeniũ tam fœcũdum, tamq; perspicax cõtigit. A L E.

Est nobis Christo Deo gratia, nõ omnino infœlix, sed tamen non tãtum, quàm forsan tibi videtur. Fit enim nescio quo modo, vt nostri nosmet pœniteat, aliena ferè suspiciamus. X Y S T. Et tũ quantum audio, aliquid insuper desyderas. A L E. Quidni? quando memoriam mihi censeo omnino fluxam & parum tenacem: nam, vt facile quæ traduntur, percipio: ita nõ sine maximo negotio percepta retineo. X Y S T. At ego difficulter intelligo, verũ semel intellecta, diutissimè reseruo: & vt video, tibi cereum est ingeniũ, mihi verò saxum. Ceræ quiduis faciliè impresseris, at impressum vestigium statim evanescit: saxo tametsi quid nõ sine labore insculpitur, semel tamè insculptum, multis seculis durat. A L E. Rectè planè confers: sed hoc me malè habet, quòd videas pleròsque ingenio numeris omnibus fœlicissimo præditos, ac vicissim moribus adeò tur-

pibus, vt non ineptè dixeris eorum ingenia malè habitare. **XYST.** Credo dictèrium hoc vetus esse, & olim de Galba, homine ad prodigium vsque deformi dictum: sic enim audire commemini. **ALB.** Probè, sed nec ipse, opinor, ineptè huc detorsit.

DIALOGVS XV.

Designat tintinnabulorum, deque immodico somno.

SERVIVS ET SULPITIVS.

Quin surgis Sulpiti? iam tintinnabula vltimū dilucularis sacrificij signum dederūt, & nō ignoras quanta hominū frequentia hoc sacrū peragatur, vt flagitium. planè sit nos in tempore nō adesse. **SVL.** Iamiam surgam, tametsi caput adhuc sopore graue sentio: vtinam liceret ad satietatē vsq; dormire: imitarer certè hodie Horatianos illos iuuenes, quibus pulchrum videtur in medios dormire dies. **SER.** At ego te diutius non operior, ne hæc mora mihi plagas lucrificiat. Ego hinc abeo: tu quādo lubet, sequere: aut tuo periculo dormi. **SVL.** Iamiam te comitabor, ne festina tantopere. **SERVIVS.** Nihil moror, nunc non est nugandi locus: à prandio verò, vbi pro more nobis à studiis remissio data fuerit, nugabimur.

DIALOGVS XVI.

De ludendi ratione agunt.

HENRICVS ET FRIDERICVS.

TV nobiscum pila ludes Friderice; an cum istis cursu mauis certare? **FR I.** Mallem cum vno & altero iucundo sodali deambulatum ire. **HENRIC.** Quin tu antè paulisper pila coludis? postea & nos vnà tecum deambulabimus. **FRIDERIC.** At ego huiusce ludi non admodum sum peritus: nam neque cautè pilam mittere, nec missam manu satis certa excipere sufficio. **HEN.** Nihil est quòd hac gratia sis sollicitus: ipsa rei exercitatio te fatis, quid facto opus sit, admonabit. Quòd si hinc modis omnibus abhorres: age, ludum minoris negotij, nempe globularem incipiamus. **FR I.** Quando ita vultis, non recuso, tametsi præter risum spectatium nihil me lucraturum scio. Siquidem vbi decies aberraro, vix semel tandem ferio, idque casu magis, quàm arte. **HEN.** Non magni refert in hoc certamine vincas aut vincaris: neque enim de capite agitur, aut pro pecunia certatur.

DIALOGVS XVII.

De questionibus commissorum, quæ de Veneris in ludu exercentur.

IULIANVS ET DAMIANVS.

EHo noster Damiane, adest rursus dies, quem ego nõ minus nobis nefastum & execrandum puto, quàm olim Romanis illū, quo in Can-

nēsi pugna tot Romanorum millia ab Annibale sunt trucidata. DAMIAN. Quid ita? Num mali aliquid huic scholæ ex hoc die impendet? IVL. Et tu nescis, præsertim tot annos in ludis versatus? DAM. Quî scire possum scholæ huius consuetudinem, nuper admodû huc profectus? IVL. Quæstiones hodie fiunt in ludo non aliter, quàm quadam carnificina. DAM. Quid narras? IVL. Vera quidem: nam de singulis, quæ per totum septimanæ cursum quoquo modo commisimus, hodie quisque pro se pœnas dare cogimur. DAM. At quî scire possunt præceptores, quæ singuli nos designemus? IVL. Arte quadam omnia expiscantur, ut nihil illis occultum esse possit. DAM. Quid ita? Num diuinationum sunt periti? IVL. Minimè. sed alia via eodē perueniunt. nam aliquot clanculum in hoc selectis prouinciam dant, nos suos commilitones deferendi, prodendique: ut nusquam quicquâ omnino tutò agere queamus. Semper enim verendum ne quispiam ex eiusmodi corycæis nos auscultet, & lupus sit in fabula: hoc est, ille ipse nobis ignorâtibus adsit, qui quasi conductitius proditor omnia ad præceptorem deferat. DAM. Hoc illud forsân est, quod lupum audio appellari: nam nomen solum in ea schola, ubi antè egi, iactabatur. IVL. Is ipse est ille clancularius lupus, quē nos miselli nō min⁹ odiosum habemus, quàm feram illam quadrupedem horrent oues. DAM. Vereor ne & nos hodie deferat. quamobrem cogitādum mihi est, ut si forsân reus fuero, vel me expurgem, vel quàm minima pœna defungar.

PETRVS ET PAVLVS *graviter ferunt defyderium
feriarum, deque capite lauando agunt.*

V A M vellem hunc diem abiisse, vt à tot
Q totiùs septimanæ laboribus, ac etiam bi-
 duì fame, ad ferias demum & carnes liceat
 redire. PA. Impatiens es moræ mi Petre, qui cum
 totam penè septimanam expectaris, diem dimi-
 diatum durare non potes? Quid autem facies,
 vbi totis quadraginta diebus à carnibus est ab-
 stinendum? PET. Rectè quidem obiurgas, sed
 nescio quo modo, quanto viciniore sunt feriæ,
 tanto magis earum me premit defyderium. Sed
 nunquid aliud dicere vis? nam ego hinc me in tō
 strinam conferam caput lotione curaturus. PAV.
 Et ipse lauandum caput exhiberem, si lotionis
 mercedem tonsori persolvere possem: nunc autē
 tantum habeo numum. PE. Sat est, nec ipse plu-
 ris lauo, tametsi rarò hos facio sumptus. Nam
 per anni circulum vix sexies lauo. At sæpè caput
 à sordibus repurgares: aiunt enim corporis emū-
 datione, & ingenium nitidius, quasi que purgatius
 reddi. PE. Sic quidem fertur, idque propterea q̃
 scientiarum sedem in capite, vtpote rationis do-
 micilio, collocant: quare ocyus eamus. PAV.
 Quando lubet.

DIALOGVS XIX.

De canticis, deque feriis diui Martini.

GEORGIUS ET CHOVRADVS.

AGE mi Chounrade, quo cantico per hanc hyemem stipem colligemus? Etenim in hac vrbe mos est vt scholastici aliquot coniunctim compositis in hoc cantilenis, diuitum conuiuia exhilarent. c. Tuum fuerit disquirere, qui rei musicæ peritiam habes, quisque huius scholæ instituta melius quàm ego, tenes. g. Quàdo in me hanc curam reiicis, aliquid minimè vulgare dispiciam. Sed die abhinc octauo quid fieri soleat, nosti? c. Dic quid? g. Erunt tum feriæ præcidenæ Diui Martini. c. Quid tum? g. Est tūc messis nobis scholasticis vberissima: siquidem in eius diei vespera, non esculenta solū nobis largius solito dantur, sed & stipem egenis dari ostiatim est receptum. c. Bene mecum agetur: quandoquidem corrasurum me spero, quo hyemem commodius transigere valeam. g. Ita spero quidem: quare ad tempus vt præsto sis, vide.

DIALOGVS XX.

De ieiunij violata religione, deque diuæ Catharine, studiorum præsidis, numine.

MARTINVS ET VALERIUS.

VID agis omnium impurissimè? v. Quid
Qadeò in me stomacharis, qui aliud facio nihil, quàm quod ientaculū capio? an tu iēta-

culum perinde ducis, ac piaculum? M. Quasi nō
 sat graue sit piaculum in homine Christiano ie-
 iunij religionem violare. v. Et hodie est indictum
 ieiunium? dic quo nomine? M. Scelestē, nescis fe-
 rias beatæ Catharinæ artium præsidis agēdas? v.
 At nō putaram præcidaneas has ferias ex eccle-
 siæ instituto sacras. M. Quid tum? cōsuetudo re-
 cepta est pro lege: & vt nulla sit cōsuetudo, no-
 bis tamē qui literas sectamur, quibus hæc virgo
 præsidet, hic dies ieiunio religiosissimo fuerat co-
 lēdus. v. Ieiunabo ergo deinceps vel hoc sumpto
 iētaculo: neque enim lautum spero prædium: &
 vt vulgò dici audio, Bis interdiu malè pasci, pro
 ieiunio est. Tametsi vt me tibi aperiam, hætenus
 CHRISTVM verum sapiētiae præsidem putavi,
 vt qui sapiētiae nomine subinde in ecclesiasticis
 cōcionibus celebretur. M. Noua quædam indu-
 cere conaris: at ego communi omnium via ingre-
 di malo. v. Nō audisti illud Pythagoræ, Per pu-
 blicam viam ne ambules? M. Molestus es: tu tuū,
 ego meum iter ingrediar.

DIALOGVS XXI.

De frigoris iniuria queruntur.

HIPPOLYTUS ET CLETUS.

Quam sunt fœlices, quibus per opes iā licet
 domi ad caminū, aut calefactū hybernaculū
 adsidere! c. E diuerso, quàm nos infœlices,
 qui miseri nullis pellibus, imò nullis penè vestib⁹
 aduersum frigoris iniuriā armati, per medios im-
 bres niues & glaciē, ostiatim querere victū cogi-

mur. Sed solatur me illud Flacci,
 Qui cupit optatam cursu contingere metam,
 Multa tulit, fecitque puer, sudauit & alsit:
 Abstinit Venere & Baccho.
 Alioqui, si similis esset exitus illorum & noster,
 non esset cur non iniurium Deum dicerem, qui
 tam iniquè res humanas administraret. HIP.
 Quin taces, nequid ferocius in Deum effutias.

DIALOGVS XXII.

De feriis diui Nicolai, deque creando episcopo.

LVCANVS ET STATVS.

QVI D. tu nobis adfers noui mi Stati? **STAT.**
 Nihil: sed in hoc te conuenio vt de com-
 munibus studiis fabulemur. **LVCAN.**
 Gratus ergo mihi tuus est aduentus, adfide huc
 nobis. **STAT.** En adfideo. **LVCAN.** Scis quid
 in diui Nicolai feriis apud nostrates fieri soleat?
STAT. Qui ipse possem scire, cum illic fuerim nun-
 quam? **LVCAN.** Dicam ergo paucis: qui ludum
 illic literarium frequentant, ex ludimagisti præ-
 scripto quempiam è suo grege episcopum creât,
 eumque magna pompa domum deducunt, & sta-
 to tempore in templum reducant. **STAT.** Quid
 commodi inde capit nouus ille & factitius episco-
 pus? **LV.** Nescio, nisi quòd conuiuio tandem ne-
 scio cuius sumptu instructo excipitur, & tamen
 lautissimè tractatur. **STAT.** Non & interim, dum in
 magistratus est, vocationem à discèdi munere ha-
 bet, aut æquè ac cæteri manum ferulæ subdit? **L**

Aequè omnino, adeò vt nō sit magis episcopus, quàm sunt hi reges, qui in tragœdiis Agamœonis, aut Priami personam gerunt. s. t. Eiusmodi honorem mihi ne optarem quidem.

DIALOGVS XXIII.

De variis spectaculis colloquuntur.

IACOBVS ET THOMAS.

QUID cras sit futurum audistín? THOM. Nihil equidem, nisi quæ aliàs fieri consueuerunt. IACOB. De spectaculis nihil? THOM. Nihil planè: num edentur aliqua?

IACOB. Edentur, & quidem varia: nam funambulos duos adesse audio, qui cras sui artificii miraculum ostentabunt. Tum farmatas aliquot ipse vidi, qui immanes vrsos ad exiguam stipem, iuxta lituorum catus saltitantes exhibebūt. THOM. Curabo quoquo modo vt & ipse intersim, etiam si me ipse intrudere debeam. 1.

Vix poteris: quandoquidem qui non numerant, foras quatiuntur. THOM. Fallam ipsos ianitores.

1. Ad hæc, princeps ipse in foro paria aliquot equitum exhibebit, qui inter sese infestis hastis concurrent. post quos circū ingredientur itē equites à calce ad verticem vsque armati, quos cataphractos vocant: hi cateruatim sine vllō aut ordine, aut arte alius in alium irruent, & se mutuis ictibus ab equis deiicient. Nam in hoc circus vndique est circūseptus: & ne qui ceciderint, grauius lædantur, simō instratus. THOM. Quam, quæso te, voluptatem ex tam furioso, & minimè iucundo

certamine capiūt isti? I. Quid? nullas nō lautitias præ hac voluptate contemnunt, præterquam q̃ hoc tyrocinio ad ferios hostium congressus præparantur, & quasi animantur. TH. Vt cunque sit, spectabo & ipse quo modo res agatur.

DIALOGVS XXIIII.

De ieiuniorum ratione differunt.

CHOVNRADVS ET AEGIDIVS.

MALE sit istis, nescio quib⁹, qui totum penè annum ieiuniis onerarunt. Neque enim satis fuit eis quadraginta dies perpetuo Christi ieiunio esse sacros, nisi insuper quarta quaque anni parte, aliquot dies nos macerassēt. Instat rursus septimana per abstinentiam transigenda. Quòd si mihi tantò apparatu prandium apponeretur, quantò illis qui ieiunia hæc indixerunt, nō admodum grauatis eis parērem. nunc cum vix toto anno semel rugientem stomachum exatiam, adhuc ieiuniis vexor. AEGID. Quid ita stomacharis mi Choūrade in sanctos ecclesię patres? qui hæc omnia bono animo statuerunt, non nobis qui hæc nec præstare per ætatē adigimur, nec per inopiā possumus; sed sui similib⁹, hoc est diuitib⁹ istis & delicatis. C. Quī scis hæc? AE. Superiori anno è quodā cōcionatore audiui, qui diuo Hieronymo (quanquā acerrimo ieiuniorum exactori) displicere aiebat maximè in teneris ætatib⁹ lōga & immoderata ieiunia: ne, quēadmodū ipse scriberet, antè pedes deficiant, q̃ currere inci-

pian. Quare tantum ieiuniorum modum imponendū, quantū ferre poterimus. c. Habeo gratiam diuo Hieronymo, qui pauperculis nobis & impatienter esurientibus patrocinator.

DIALOGVS XXV.

De feriis natalitiis CHRISTI confabulantur.

PENIVS ET FRANCISCVS.

ET gaudeo, & doleo mi Francisce, festa hæc natalitia appetere. Gaudeo quidem quòd hæ feriez omnia læta & festiua secum apportant: doleo autem, quòd scholasticis nobis in addiscendis horum festorum cantionibus grandis est exhauriendus labor. Præterea totis diebus in templis algendum. Postremò & illud vereor, ne si matutina sacra, alto nimis sopore detentus, neglexero, & plagas mihi lucrifaciam. FRANCIS.

Vera sunt hæc quæ dicis: attamen quando hanc conditionem accepimus, aduigilandum nobis erit, & omnia fortiter perferenda: nam & peiora his passi sumus. dabit Deus his quoque finem, ut taceam hos nostros labores in pietatis cultum cedere. P. Certè plus satis delicati essemus, si non tantum molestiæ vel pel pro solo Christo deuorarem: cuius respectu tot infantium innocens ætas crudeles barbarorum militum gladios est perpessa, cuius rei memoria & his feriis coniuncta est. F. Sed illud, quæso, quid sibi vult, quòd sacrificuli in diui Ioannis feriis popularibus vinum è sacramento calice propinât? P. Nescio equidem, nisi quòd

audiui hoc poculum, utpote sacrum, antidoti vice esse contra veneni pericula. F. At ego nolim hac fiducia cicutam bibere, quantumvis sit hoc poculum, ut dicis, sacrum.

DIALOGVS XXV.

De noni anni ingressu loquuntur, deque misitandis strenulis.

BRVTVS ET PETRVTVS.

Faustum annum hunc nouum & fœlicem tibi precor mi Petruti. P. E. Et ego, ut cum fœnore tibi reponam, non hunc solum qui iam ingreditur, sed omnia totius vitæ tempora beata tibi opto. B. Tametsi malletm strenulam mihi potius darès, quàm magnificam illam & solennem imprecationem. P. At quas strenas dare possit Petrutius, qui præter pauculos libellos habet planè nihil? B. Libellum quempiam dares, quando bellè quadrat, ut homo literis deditus, literarium quoque det munusculum. P. Verùm hac liberalitate studiorum meorum iacturam facerem, quod nec ipse, si modo amicus es, nobis suadebis. B. R. V. T. Iocabar tecum, & te, quid animi haberes, volebam pertentare, cum has consuetudines nec ipse magni faciam, ut qui iam sæpè audiuerim eas nobis è gentilitate relictas. Cuius generis esse audio, quòd in quibusdam Christiani orbis regionibus pridie feriarum, quæ tribus Magis sunt sacræ, singulæ domus singulos reges creant: nam hæc omnia ex Ethnicorum Saturnalibus in hæc vsque tempora defluxisse apparet.

P. Quia trium Magorum mentionem fecisti, velim sicubi aut audieris, aut legeris, ipse mihi expedias primum quid sibi velit, quod eos diuos alii reges, alii Magos appellēt quod posterius ego de solis maleficis & præstigiatoribus dici putabam: nam vtrunque, vt nosti, in sacris canimus. Deinde cur hæ feriæ Græco vocabulo *ἑπιφάνια* nuncupentur. BRV. Dicam quæ super hac re partim ex præceptore dictante, partim cōcionatore superiori anno excepi. Principio Magorum appellatione, Chaldæi non vt vulgus putat, præstigiatores, sed viros sapientes nuncupāt, & secretorum naturæ conscios, quorum professio à quibusdam etiam Latinis Magia naturalis dicitur. sed quia hæc res finibus suis non contenta, temporis progressu in curiosam quandam dæmonum imposturam est delapsa, cœpit honestissimæ artis vocabulum probro esse. Quod autem iidem hi reges in psalmi prophetia dicuntur non sic est accipiendum, vt hodie sunt reges, hoc est tot ditionum potentes, sed qui quoquo modo magistratum gerunt, suntque numero vulgi exēpti. Quo modo & Hesiodus corruptos iudices & aduocatos, *βασιλῆας δωροφάγους* appellat. Porro apud veteres theologos Græcos, vt Gregorium Nazianzenum, audio ipsa natalitia festa, *ἑπιφάνια* dici consueuisse, quod in his Deus homo apparuerit. Verum quod & Magorum ferias hoc vocabulo celebrant, hinc opinor esse, quod illis dux stella apparuerit. habes quæ ego de hac questione audiui. Plura si vis, ex doctiorib⁹ require.

DIALOGVS XXVII.

De cereis in feriis beate Virginis gestandis agunt.

VALERIUS ET NICOLAUS.

Quid tu cereū non habes mi Nicolae? **NIC.**
 Vnde haberē: qui nec pecuniā, qua victum
 emere possim, habeo? Sed si domi apud
 meos agerē, nugas eiusmodi mihi pararet mater.
V. Et tu nugas vocare audes res sacras? **N.** Quid
 ni? neque enim statim fuero hæreticus, etiam si
 nullum gestem cereum, maximè cum nō sit vnde
 emā: tum & Christo putarem lōgè fore gratius, si
 sumptus, quos cereis emēdis facimus, in pauperū
 vsus cōuerterentur. **V.** Atqui est hæc laudabilis
 cōsuetudo. **N.** Est omnino, sed nō adeò, vt præ
 ea, meliora & magis Christiana officia negligi de-
 beant. **V.** Rectè putas: nam & ipse sæpè stultam
 muliercularū pietatem risi, quæ suffigēdis etiam
 quotidie cereis triginta sex, adeò sibi placēt, vt
 per hoc, cælum se demereri credant, quātumuis
 fortiter in platēis pauperes esurient.

DIALOGVS XXVIII.

De Baccchanalibus Christianorum fabulantur.

FABINVS ET FRANCISCVS.

Quid causæ est Francisce, quòd heri ludum
 nō es ingressus? **F.** Grauius ex capite labo-
 rabā, vt lucem ferre nō possem. **FA.** Bellè
 morbū excusās, quādo vulgare iā est scholastico,
 siquādo vel discēdi sudorē horreāt, vel ferulā me-
 tuāt, ignauix suæ valetudinē prætexere, vt scho-
 lasticus morb⁹ pro assimulato & cōfictō, iā pridē
 in prouerbiū abierit. **F.** Quid alij faciāt nescio:

certè quod ad me attinet, mallem decies ferulam pati, quàm semel in eum dolorem recidere, etiam si vix dū planè reualui. Sed quid tute iam hîc verfaris? an non hora iam est præceptoribus auscultandi? F. Est, sed ob hæc Christianorum quasi Bacchanalia tridui missionem nobis dedit præceptor: vetuit tamen graui, siquis dicto audiens nō fuerit, proposita pœna nequis opificum istorum manuariorum exemplo larua personatus viciatim cursitet, quòd hæc insania cum bonis omnibus, tum maximè Christianis sit indigna. F R. At ego iam dudum laruam in hūc vsum domi inclusam adseruo. FAB. Vide quid agas, nam de laruis cautum est. Porro computationes & cantiones ciuiles indulgit. F R. Parendum erit: alioqui post impermissa gaudia fortiter plorabimus.

D I A L O G V S X X I X .

De ieiunio, deque confessione, quam vocant agnus.

V I T V S E T S E V E R V S .

QUID istud portendit Severe, quòd ita cogitabundus inambulas? nam mihi arduū quiddam meditari videris. S. Rogas? quasi non ipsum hoc tempus te, quid agerem, docere possit. V R. Ieiuniis ergo crebris te mace-
ras, vt eiusmodi faciem exhibeas? S. Minimè, sed quæ parum religiosè in Deum conditorem, ac eundem liberatorem malè gratus admisi, ea nunc in memoriam reuocare studeo. Iam enim tempus

simul ac ecclesiæ edictum postulat, vt peccata nostra diligēter excussa, tutis sacerdotum aurib⁹ censenda deponamus, quò ab eis de peccatorum ratione edocti, videlicet quæq; leuia, quæq; grauiæ sint, deinceps cautius viuamus. v. At incurius ego, ne semel quidē adhuc de re tanta cogitui. s. e. Hac ratione nihilo es melior, quin maturè nobis hoc munere defungendum est: nimirum vt hoc confitēdi onere, quo nullum est grauius, liberati, diui Gregorii, studiorum præsidis, ferias agamus expeditiores. v. At istis feriis, quæso te, quid tandem agitur? s. e. Quia is diuus studis, vt dixi, præsidere putatur: pueri qui suam ætatem in literis agere volunt, eo die in hanc nostram militiam nomina dant faustis, vt ominātur, auspiciis. vi. Et quando hæ erunt feriæ? s. Die, sicut opinor, abhinc decimo. vii. Quando ita suades, & ipse mihi auricularium sacrum (sic enim vocant nonnulli cruditi) quæram, in cuius sinum mea delicta effundam. s. Si lubet: eum accedēdi dabitur facultas, quem ipse iam semel atque iterum diligentem sum expertus. v. At ego mallem oscitatem aliquem, quem non magno negotio in aliquot criminibus fallere possem. s. e. v. At hoc non est Christianum agere, sed vulpinam fraudulentiam referre: verum tu videris.

MARCELLVS ET ANTONIVS.

Salue Antoni. ANT. Et tu mi Marcelle. M. Quid est quod ita discurre? quem quæris? A.

Quæro qui mecum rus eat, mihiq; in emendicandis ex more ouis sit socius. M. At hæc cōfuetudo praua est, & indigna eo qui se liberalibus studiis addixerit. Quid enim seruilis, quàm decem ouorum gratia, agrestium caulas ostiatim abambulare, ac interim domi lectionum iacturam facere? A. Sed vnde famem pellam, si non cibos vndecunque conquirere licet? M. Hic in vrbe quantum naturæ satis est, nancisci potes: nam quorum beneficio totius anni victum conquiris, eorundem benignitate & paucos dies transigere posses. A. Frustra te appello: seuerior es, quàm vt tecum rem habere velim: ipsa es sapientia. M. Age, age vt lubet.

DIALOGVS XXXI.

De sanctorum communione colloquuntur.

PAVLVS ET LVCAS.

Obscuro te mi Luca, modis omnibus nos excutiamus, atq; ab omni peccatorum sorde pœnitentiæ scopis repurgemus, ne ad tãti principis, qui semel nutu nos perdere potest, mēsam illotis quasi manibus accedamus, & panem illū cę-

lestem ac admirandum, polluto ore, imò & animo sumamus, de quo heri tam pia, támque frugifera differuit ludimagister. L V C. Equidè pro mea virili ad hoc enitar: sed rogo, quidnā de hoc mysterio disputauit præceptor? nam ipse nō interfui. P A V L. O miserum qui talia negligis.

L V C. Adeste non quivi, alibi occupatus: quamobrem vehementer oro & obtestor, ne mihi rem adeò salubrem inuideas. P. Aiebat tantam esse virtutem huius admirādi cibi, vt qui eo ritè vescerentur, fierent vnum corpus atque vnus spiritus cum Christo, sicq; in Deum, Deique filium abirent. Sed si quis impurus contingat, eum non salutem, sed extremā animæ perniciem sibi inuenire. hortabatur ergo nos omnes, vt his diebus peccatores cū Christo in cruce moreremur, quo fœlicius & synceriori cum gaudio, vnà cum eo in vitam trāscamus. Hoc enim dicebat significari per hæc appetētia nunc festa, quòd Pascha, Hebræis trāsitum, à morte peccatorum ad vitam virtutum sonet. L. At interim quid fit de placentis, & id genus aliis bellariis, quæ ad imminentes has ferias parate consueuerunt? Non & de illis quid audiisti? P. Apage, tuus animus iam est in placētis, quum hoc temporis articulo Christus olim de vita sit periclitatus. Placētæ atque huius generis illecebræ aliæ suo loco sermonem dabunt: nunc de alio cibo solliciti esse debemus.

De lustratione urbis & aruorum fabulantur.

VRBANVS ET CHILIANVS.

Vid est Chiliane, quòd tanto molimine
Q platéas & vicos omnes verrunt? nò prin-
 cept quispiam huc est venturus? CH.
 Minimè: sed quiddam cras est futurum, cuius
 gratia meritò hic fit apparatus. VRB. Quid hoc
 quæso? CHIL. Solenne iam est, crastino die
 urbem corpore Cristi lustrare: siquidem prima-
 rius hic sacerdos sacratissimum hoc corpus cir-
 cum mœnia gestabit, vniuersa sacerdotum ma-
 nu, atque item populo omni, à tergo sequenti-
 bus. VRB. Sacra forsan erunt, quæ nonnulli
 Ambarualia non ineptè vocari volunt. CHIL.
 Erunt. VRB. At quando agentur Ambarualia?
 sic enim vocantur quæ apud Ethnicos erant Ro-
 bigalia, Paliliâque. CHIL. Perendie. VRB.
 Num & nos eis sacris adesse oportet? CHIL. Ma-
 ximè, pariter & clericorum ordinem omnem.
 VRB. At apud nostrates, soli agrestes, sacrificio
 præeunte, agros obequitant. CHIL. Sûus cui-
 que regioni est mos, qui pro lege est habendus.

DIALOGVS XXXIII.

*De spectaculis comædiarum, tragædiarumque
exhibendis fabulantur.*

LEOPOLDVS ET SEVERVS.

SCIS Severe, quæ spectacula die crastino, qui
est à feriis sacratissimis corporis Christi octa-
uus, edi consueuerint? **SEVER.** Quî ipse
scire possem, cum superiori anno non adfuerim?
LEO. At audisse ex aliis poteras. **S.** Quæ ad me
parum attinent, ea non magnopere soleo exqui-
rere. Sed dic oro, quid tandem est quod iactas? **L.**
Tragædiam eorum cruciatum, quos pro nobis
tulit seruator Christus, histriones agêt: sunt enim
ad hoc delecti aliquot. **S.** Quæso te, omnibus
etiam adhibitis personis? **L.** Omnibus omni-
no. **S.** Ipse in hac fabula malle durissimi mi-
litis aut carnificis personam gerere, quàm ipsius
Christi. nam tametsi, vt conicere possum, res fi-
ctè repræsentabitur: sic tamen abire non potest,
quin is, qui Christum refert, multas interim mole-
stias in se recipere cogatur. **L.** Et ipse in hac
fabula spectator esse malo, quàm actor, vtcūque
res interim agatur seria.

*De coronis gestandis, deque earum vario
genere colloquuntur.*

BASILIVS ET GREGORIUS.

VNDE tu te proripis Gregori? aut vbi hanc coronam rosaceam es nactus? GR. E foro veni, mi Basili, vbi certum hoc numo mihi coemi. B. At in quem vsum? G. Animus est eâ capiti impositam gestare. Nónne vile tibi videtur tot rosas vnico numolo parari? B. Et te tantum asinum non pudet puerorum ritu, coronatum incedere? G. Puderet? grandes natu, & canî etiam hîc gerunt. B. Nihilo ergo sunt grauiores: forsân hunc morem à Græcorum mollitie sumpserunt, quos apud Homerû subinde καρκινώοντας audio dici. G. Vnde sumpserunt equidem nescio, hoc scio quòd gestant. B. Num solas rosaceas gerunt, & an violaceas pariter & liliaceas, aut etiam rosmarino, vel amaraceo intertextas? G. Omnis generis flores, ac odora menta concinnant. B. Faciant vt lubet, ego nihili pendo istas nugas, tantû abest, vt pretio emere velim: quòd si pecunia superesset, verum butyrum emere malim: hoc enim in alimentum cederet, cum fertorum, si odorem excipias, nullus planè sit vsus.

DIALOGVS XXXV.

De feriis diui Urbani, confabulantur.

RAPHAEL ET SERVATIVS.

VTinam alas mihi sumere liceret, vt hinc domum auolare possem : etenim nimis quàm cupio crastinum diem in patria transigere, quam facultatem magno emere non recusarem. s. Quid hic sibi vult? tu te homine exuto in volucrem mutam vis degenerare? aut quid noui accidit quod tam repentinum tuum iter postulet. r. Rogas? nescis cras ferias agi diui Urbani. s. Noui: sed quid tum? r. Hunc diuum eodem penè ritu, & iisdè ceremoniis colunt nostrates, quibus Ethnici olim Bacchum: vt quæ illis erant Bacchanalia, nobis penè sint Vrbana. s. At in quem vsum faciunt hæc Christiani? r. Putant hoc diuo sic placato fœlicius prouenire vuas. s. O stolidos homines, qui sanctorum numina crapulis ac computationibus demereri se credût, cû illi abstinencia & sobrietate principi Deo placuerint!

DIALOGVS XXXVI.

De commodis ac molestiis variorum temporum differunt.

CORNELIVS ET GVLIELMVS.

VT NIHIL est vsque ex omni parte fœlix ! Quid stomacharis tecum mi Corneli? c o r. Num iure stomachor,

cia in Calendarium scribit. Postremò cogitadum semper, sic placuisse naturæ conditori Deo, vt in mundo nihil sit hominibus omni ex parte beatũ, quo videlicet ex his mundi perturbationibus ad aliam patriam aspiremus.

DIALOGVS XXXVII.

PANDVLPHVS ludimagistri minister HIERONYMVS scholasticus, & LVDIMAGISTER, consultant in quam potissimum Academiam studiose sit commigrandum.

PAND.

Quid tu hoc ante ostium Hieronymi? aut quid hîc tibi negotii est. **HIERO.** Ludimagistrum cõuenire volebam: sed pulsare cunctabar, veritus ne intempestiuè fortasse venirem: quare te pro veteri nostra consuetudine rogo, vt hîc me adstare significes. **P.** Faciam: tu hîc tantisper morare, dum quid rerum sit, huc renuntio. Here quod iniunxeras, diligenter est curatum. **LVD.** Benefactum. Atqui is est quicum pro foribus fabulantem te audiui. **PAND.** Scholasticus quidam nomine Hieronymus, tibi familiariter notus, qui te, si modò tempestiuum est, coràm alloqui cupit. **LV.** Intromittatur: iam nunc quid velit, coniicio. **H.** Salue humanissime præceptor. **L.** Et tu saluus sis optime adolescens: sed quid est quod me velis? **H.** Paucis dicam. Quia iam biennium te in hoc ludo docentem audiui, vtriusque literaturæ prima rudimen-

ta tua ope vtcunque percepī, hortatur nunc me
 tum parens, tum etiam hæc mea ætas maturior, vt
 hinc Academiam aliquam ad vberiores inge-
 nii cultum capiendum me conferam. Hoc vt fœ-
 licius faciam, tuo cōsilio opus est: nam inter tot,
 vt vocant Vniuersitates, quot iam olim sunt insti-
 tutæ, & hodie passim nouæ exoriuntur, mihi eius
 modi rerum ignaro, difficile planè est eius, quæ
 omnium sit instructissima, & meis studiis accom-
 modatissima, delectum habere. **LVDIM.** Pru-
 denter hîc deliberas Hieronymè. Sunt Acade-
 miæ, idque in Germania, quas vehementer pro-
 bem: sunt item quas cupiam vel omnino non ef-
 se, vel in totum immutari: vt enim in re militari
 duci dux, & militi miles: vt in Repub. senator se-
 natori, & ciuis ciui, artifex artifice: vt denique ho-
 mo homini: sic schola scholæ, doctor doctori, ma-
 gister magistro præstat. Quod discrimen qui nō
 aduertit, operam & oleum (vt aiunt) plerunque
 perdit: ac, vt certum aliquid q̃ hîc sequaris ha-
 beas, in hac deliberatione spectandum erit, non
 quæ magnificis ædificiis (tametsi & hæc decoris
 aliquid addunt) sed optimis omnis generis præ-
 ceptoribus sit instructissima. Primum, quæ trium
 linguarum professores habeat & doctos, & bo-
 nos: hoc, vt velint: illud, vt possint rectè docere.
 Siquidem Latinam, Græcam, & Hebraicam lin-
 guas in Christianorum scholis doceri Pontificiæ
 leges iubent, & veterum theologorum exempla
 suadent, ac denique Christianæ Reipub. vsus exi-
 git. Habeat denique theologos, si non plures, vnū
 saltem, aut alterum, cum scripturarum intelligē-

tia, tum vitæ sanctimonia egregiè probatos : tum iureperitos non minus prudentia, quàm & facundia laudatos. Adhæc medicos, quos naturalium rerum profunda cognitio, & curandi fides perspecta commendet. Postremò philosophos, non qui sophisticam rixandi pertinaciam ex ineptis barbarorum commētariis inculcent, sed qui philosophando Platonis maiestatem, acumen Aristotelis, Theophrasti eloquentiam proximè referant. Quāquam autem Gymnasium eiusmodi minoris negotij est describere, quàm vsquam inuenire: ad præscriptam tamen imaginem utcunque accedunt hîc in vicino sitæ, LIPSIA ET VVITTEMBERGA. Nec ERPHORDIA cuiquam est aspernenda, vt nec BASILEA. Super omnes verò, trium linguarum professione floret LOVANIVM, schola vel hoc nomine omnium fœlicissima, quòd magnum illum & sapientiæ & eloquentiæ principem habet ERASMV M: & summum illud ecclesiasticæ dignitatis ornamentum, Albertus Cardinalis magnum quiddam Moguntiae suæ molitur. Quod si processerit, erit quo se Germania exteris hominibus venditet. Porro illud in primis tibi cauendum, ne ad sublimes illas professiones, quas vocant, illotis (vt aiunt) pedibus irrumpas. Quin modis omnibus curandum, vt vtriusque literaturæ modiocri cognitione præparatus accedas. sic enim futurum, vt in disciplinis his grauioribus citius & facilius quoquò tendis, peruenias, & rectum in rebus omnibus iudicium consequaris. Hoc qui caret, frustra se aliquid fœliciter

discere sperabit. HIE. At in eiusmodi scholis receptum audio, vt scholasticorū quisque præceptorum quempiam sibi deligat, quo familiariter vtatur: non tantum ad literarum studia, sed & formandos mores: hic quid mihi faciendum suades? LVDOVIC. Quid aliud, quam vt antequam te alicui in disciplinam dedas, diuitum istorum delicias imiteris? qui, cū multa vini dolia in cellis habeant reposita, non statim è quouis bibunt, sed pitissando, omnibus ex ordine degustatis, quod firmissimum fuerit & suauissimum, hoc demum in palati sui vsum relinunt. Quin ergo & tu, & cum ex aliis sciscitaris, tum multos eximios eiusdem professionis doctores audiendo exploras ipse, cui potissimum ingenii tui solum rectissimè excolendum loces? Tametsi sunt & aliæ cōiecturæ, quibus in hoc vti possis, vt sicui suæ lucubrationes insignem peperere famam: siquem eruditorum calculi aliquot probent: sicui ab aliis eiusdem musæ æmulis insigniter inuideatur: siquem vel iudicium principis, vel Reipublicæ cōsensus à contemptu vindicet: sicui magna sit lectissimorum iuuenum frequentia: siquis discipulos aliquos egregiè doctos reddiderit: denique siquis Pythagoræ exemplo non quenque statim in disciplinam suam recipiat, & aliis plura ac meliora pluris quoque doceat. Caue enim committas ad quenquam te alliciat sumptus vilitas, aut à quoquā deterreat impensæ magnitudo: quando ferè fit, vt qui paruo docent, parua: qui magno magna quoq; doceant. His indiciis si prudenter vtêris, vix vnquam tibi imponet quisquam. Cæ-

tera rerum vsus, optimus magister, ætatis progressu te faciliè docebit. H I E. Sat est. Quod restat, pro salubri adeò consilio gratias tibi immortales tuus agit Hieronymus, si quando dabitur facultas, egregiè quoquo relaturus. L V D. Nihil ad dubito. Tu, quod tibi fœlix ac faustum sit, ad bonarum artium mercaturam proficiscere. Vale.

D iij

Doctissimo viro SIMO-
NI PEHM, GYMNASIAR-
chæ in monte diuæ Annæ, Christo-
phorus Hegendorphinus
S. D.

CIRCUNFERVNTVR passim, vir doctissime, Dia-
logi virorum doctissimorum pueriles loquendi formas re-
presentantes: id quod vix dici potest quàm pueris vsui fu-
turum sit. Errant illi & vehemèter errant, qui non his loquẽ-
di formulis pro positis, puerorum linguam expolitiorem reddere
laborant. Erasmus ille magnus alicubi hoc ipsum cum pueris fa-
ciundum esse admonet: eius calculum nemo non candidè probat.
Quapropter & ego illorum virorum stimulis excitatus, Dialo-
gos quosdam ludere cæpi. In quibus si non omnia virorum supe-
riorum vestigia imitabor, ignoscere debes. Mihi non tã propitius
Mercurius est, mihi non iam dulces camæna: quicquid possum,
reddo: non gloriola choragium ambio, contentus, si quantulumcum-
que utilitas ad bonæ mentis adolescentes emanarit. Tibi autem
viro doctissimo dedicare hos Dialogos visum est, quod soleas re-
bus ipsis impensius favere, ex quibus puerorum lingua utcun-
que expoliri potest. Et non paucis annis huc omnes conatus desti-
nasti, puerorum vt balbuties succurreres. Et ego mutuam tibi o-
peram prestare non erubesco tua humanitate fretus, qua nemi-
nem non in & laboris & honoris collegium asciscis. Accipe igitur
quicquid est xenioli: grauiora, Deo auspicante, dabimus, si
has nugas non omnino displicuisse videro. Vale.

Georgius & Chri-

STOPHORVS DE VE-

RIS TEMPERIE

colloquuntur.

GEORG.

SALVVS sis mi Cristophore. CHRISTOPHOR.

Et tu salve. GEORGIVS. Quid rerum
agitur hoc iam veris tempore? CHRISTOPH.

Nihil equidem rerum, nisi quòd plurimùm gau-
deo asperum hyemis tempus defluxisse, atque
iam amœnissimam veris temperiem appetere.

GEORGIVS. Ecquid refert quo tempore vi-
uas, modò in literis viuas? CHR. Tu pol homo
non es sobrius, hyeme, quæ mala exhauriamus,
tuo ipsius, opinor, periculo expertus es: nempe
quòd malè vestitus, & sæuiente iam bruma, ci-
uium domos quæritandi victus gratia oberrare
cogeris, & aliquando ita frigore manus obrige-
scunt, vt ægrè ollam in manibus gestare queas.

GEORG. Bellè narras: acurem tetigisti: sed
ego hoc ipsum infortunium, Deo laus, nondum
expertus sum, vt qui à parētibus semper tot com-
meatus capiam, quò hyemis sæuitiam propulsa-
re possim: quanuis ita exhaustus sim vt neque
quid edam, neque quid bibam restet. CHRIST.
Non est quod te hoc tempore maceres: in patriã
cōcede, & commeatu in futurum æstium tem-
pus te instrue. GEOR. Memorem mones, & vt
Homerus ait, σπινδοῖα δ' ὀϊστὸν . Ego ipse iam

D iij

eo missionem à præceptore petiturus, quò in patriam me conferam. CHR. Et mihi animus esset patriam inuisere, si sperarem me quippiam à patre corradere posse. Sed è pumice citius, sat scio, aquam extorseris, quàm vnum à patre numulum, tam philargyrus est, tam semper veretur ne ad incitas redigatur. G. Et quæ, malum, demétia est patrem velle literis te addicàs, & non murtà pecunia studia tua alere & fulcire? Pecunia opus est: alioqui nihil omnino in literis agas, necessum est. Vnde non immerito comicus quidam plutum diuitiarum deum loquētem facit, *δι' ἐμοῦ πάντα γίνονται*, id est, per me omnia fiunt. CHR IST. Quid ais? ego, quantum in me situm est, reddo, proborum hominum opera suffultus. Nam hæctenus, laus superis, nunquam pecunia defuit ad comparanda dictata scholastica. G. Sed hac de re posthac, ne in lente vnguentum, quod dicitur. Nunc quod nostri est instituti, affectū curabimus. accedamus præceptorē. C. Sat scio, non permittet nos patriā inuisere: vix enim quadragesimæ carceres ingressi sumus. G. Tu pol tuā ipsius vmbra reformidas, mihi negotium curandum da. C. Deus fœliciter vertat. PV. Ad malos coruos, quis ita fores pulsat? En Georgi, en Christophore, quid vestra cupiditas est? quid aduētus vester præ se fert? GEOR. Est præceptor intus? PV. Est. GEORG. Quid rerum molitur? P. A prandio domum rediit, vltro citroque commeans. GEORG. In tempore aduenimus: paucis eum compellare velim, nisi aliis vacaret. P V. Hic pedem fugite donec reuertar: periculum faciam quid rerum agat.

Præceptor humanissime, sunt pro foribus duo adolescentes, qui paucis cum tua humanitate agere volunt. PR. Qui sunt? huc accersantur. GE. Salve præceptor humanissime. PR. Et vos saluete: quid est quod me vultis? GEO. Non ignoras præceptor humanissime, iam quadragesimæ tempus instare, in quo non parum propter com meatus penuriam, fame maceramus, pecunia ad viuumvsque denudati: nec obulus restat quo restim emamus. Quare velim tuo favore patriâ repetere nobis liceat: gratias interim agentes, quod nos in scholasticorum album ascripseris, & optimis quibûsque artibus nos erudieris, olim gratias relaturi, siquando per fortunam nobis licuerit. Et quod impræsentiarum nobis non datur, Deus Optim. Max. cumulatus rependet. PRAEC. Mirum est vos tam citò hinc auolare velle: octo aut amplius septimanæ supersunt, prius quàm prælectiones vestrae ad umbilicum deducantur: & vos iam hinc discessum adornatis? si meo cõsilio obtemperare vultis, quod arbitror, vos nos non infrugiferum experturos, ad vnam aut alteram hebdomadam nobiscum duretis, velim. Nihil negotii vobis domi est. G. Fames ipsa nos domum abigit. PR. Dii boni, si alii non fame pereunt, nec vos, vt opinor, fame peribitis, tum si nihil aliud hîc remorari possit, hoc saltem remoram vobis iniiciat, quod his diebus peccatorum detestâdorum rationem vobis tradam, quo in sensus nouitate reformati, Christo fructus edatis in patiëntia. Transitum, Pascha Hebræis sonat. Nempe quod hominibus iam ex peccatorum tyrannide, ad vi-

tuam libertatem aspirandum est. G. Tam libenter hoc discere velim, quàm nobis usus futurum scio: sed parentum affectus hinc diutius agere non patiuntur. PR. Ut lubet, vos inuitos seruare non consilium est, per me ergo domum proficisci potestis, modò date operam, ne vos moribus sub agrestibus apud patentes geratis, ne suspicetur vos illam morum luem in ludo nostro contraxisse. G. Faciemus omnia sedulò, remis tum velis conantes, ne ludo tuo dedecori simus. PR. Ite ergo fausto auspicio. G. Valeat tua humanitas faustiter præceptor humanissime.

HENRICVS ET FRIDERICVS

*De estate colloquuntur, & in quem ludum
literarium proficisci velint.*

FRID.

VT VALES mi Henrice? H. Optimè valeo, quo in cardine res tuæ aguntur? F. Omnia, læta, omnia auspicata: cum parentibus satis superque egi: in ludum triviale me conferam, sub docto aliquo præceptore militaturus. Tu, si te mihi comitem addere vis, gratum erit ut quod maximè. H. En optato res cadit, diu mecum cogitavi in ludum aliquem proficisci velle: nec ego solus iter facere soleo. Tu ergo mihi comes vel multo gratissimus, diuina, ut dicitur, virgula oblatus es. F. In quem autem ludum te tradere animus est? H. In quæcunque tu volueris. F. In Lipsensem, audio enim illum omni studiorum genere vel in primis flore. Tum Gymnasiarcha illi ludo præfectus est, homo mirè facundus, & in

nullo non scientiarum genere Roschius. Adde quòd vrbis ipsius celebritas me illuc adigit. H. Sed audio pestem illic vehementer grassatā esse. F. Amici cuiusdam literis compertum habeo, pestem desæuisse. Academiæ quoque magistros illuc pedem retulisse. H. Non fieri potest, vt pestis omnino desæuierit, si scholastici ex omnigenis oppidis, in quibus hætenus pestis populata est, confederint: ex afflatu ipso peste corripiamur oportet, præsertim in his æstiuis mensibus, quibus nō rarò tam numerosa scholasticorum turba cōfluit, vt eam vix capiat ludus. F. Quid cornicaris inepte? facile est inuenire futelas, quibus tuā inertiam oppallias. Nos nō soli illic erimus, cum aliis adolescentibus fortunæ experiamur aleam, siue moriemur, siue viuemus, Christo moriemur, & Christo viuemus. H. Tum vt audio, non licet æstiuis mensibus frigida lauare, nec cerasis decerpēdis mutuam agricolis operam collocare, nec aliquot dies scholis abesse: plus quàm Argos illic agere audiui, qui circunforaneam illam turbā obseruent. Nec desunt Corycæi, qui clandestinos fermunculos, quos amicus cū amico nugatur, ad præceptorē deferant. F. Iā audio quàm nihil scholasticum in te spiret: scholasticum agere vis, & rusticorum negotiis te immergere cupis. Scholasticus ἀπὸ τῆς σχολῆς dictus est, hoc ab otio literario, nepe qui rusticarū rerum labyrinthis exemptus, se totū literis addicit. H. Sed quis semper lites operam nauare potest? omnium rerum satietas est. Vide tu ne studium plus quàm adamantinum in neruos abeat. F. R. Tu vnus obuli gratia literas

fat scio, deuoueres. HENR. Quæ Pallas tibi hæc in mentem misit? FRID. Audio te cerasis carpendis additiorem esse, quàm vt in literis bonis aliquam sementem facias. HEN. Non semper patruos sapere oportet, ludèdum aliquando par impar, equitandum in arundine longa. FRI. Adolescentes sumus, non est quod doctissimorum virorum collatione nostro otio blandiamur. si eò erepserimus, quò illi veluti in Olympiade euaserunt, ea feriandi à literis libertate vtamur, licebit. Iam illud Titi Vespasiani in intimos pectoris recessus insculpas oportet, qui dum aliquando recordaretur, se aliquo die nihil egregii præstitisse, ô me *τῆς κατὰ γὰρον* ait. Ille dies hodie periit. Id quod Apelles pictor ille nobilissimus nō in strenuè imitatus est, qui nullum diem absque linea esse oportere dicebat. H. Sed iâ non ignoras, quàm solis æstus ingrauescat, & quàm capita Anticyris digna faciat. F. Non est quod solis æstus te pregrauet, si interdiu prælectionibus audiendis tempus impertias, diluculo verò è lecto surgens à capite ad calcem vsque repetas, optima quæque in memoriæ thesaurum deponas. hoc agas oportet, si non vis ex paleis tuorum laborum inanes cumos excutere. H. Iam in viam reduxisti, iam reddidisti animum: quoquò tu profectus eris, ego te comitabor.

I O A N N E S E T S E B A L D V S

De autumnis tempore confabulantur.

EC Q V I D agis Sebalde? I O A. Ecquid agerem? Iam supellectilis meæ sarcinam colligo, domû

aduolaturus. s. Hui,tam cito! i. Cito!Bartho-
lomæi feriæ elapsæ sunt, Mariæ natalis in foribus
est. Vix domum rediero , & Michaëlis feriæ me
anteuertent.s. Ecquid te domum abigit? i. Vin-
demia iâ faciûda est , & me musto in lacunis sub-
scatente ad plenum vsque explebo. seb. Homo
es Bacelus , qui musti gratia studiorum iacturam
facere vis. i. Prælectionibus omnibus iam qua-
si colophonem imponent. seb. Si expectare
vis paulisper,donec literas patri perferendas cō-
scribam,te rursus visam. ioha. Seculum effluet,
quàm hinc me auellero. seb. Non velim ieiun-
us iter aggrediaris. Nam medicorû præscripto
constat autumnum magnum malorû agmen ho-
minibus adferre. ioha. Sæpe demirari solitus
sum, cur in autumno homines in tot malorû ge-
nera cadant. s. Medicorû calculus est,propterea
in autumno variis vicibus hominum corpora af-
fici quòd prima luce nescio quod frigus panicû
homines inuadat. Meridie autem, calor quidam
repentinus oboriatur. Vnde ex illa temporis va-
rietate corporum crasis perturbatur. i o h a n n.
Iam,audio, in medicorum diatribis enutritus es,
vt qui tam arcana medicæ rei mysteria, veluti ex
Tripode pronunties. seb. Tum autumno quid
Lipsiæ fiat,scis? ioha. Quî ego scirem?Tu qui
olim illic versatus es,apertis,vt dicitur,tibiis edif-
fere. seb. Agricolaë in dies plenos pomorum,
pyrorum, mespilorum calathos in forum aspor-
tant, vbi aliquando ego Græca fide mercari so-
leo. iohan. Quibus autem strophis eludis,ne ab
agricolis arripiaris? seb. Gygis annullo vtor , vel

alium mihi adiungo, qui poma & pyra licitatur:
& cum agricolæ in gremium mihi numerarunt,
ego me in pedes quantum possum proripio, Pu-
nica fide exoluēs. 1. Solent autem ne te insequi.

SEB. Qui insequi me alio circunstante possunt?
Verentur, ne, dum Iunonem insequūtur, in nu-
bem incidant, hoc est, ne dum paruo cuidam dā-
no mederi volunt, in grauius prolabantur. IOHA.

Quid si ad magistrum deferrent te: quot quæso
plagas tibi lucrifaceres? SEB. Quid? veluti ele-

phātina cuti iacula eiicit, sic & mea cutis ad quæ-
uis flagra occalluit. IOHAN. Cretissare videris. s.

πῶς τὰς τέχνας ἐγχείσῃς, vt quidam dixit, hoc est,
Paupertas artes excitat, & fames ipsa, chamæ-
leonta agere docet. 10. Audiui quondam à meo

præceptore apud Græcos morem fuisse, quòd fa-
mem virgis ex ædibus eiicerent, dicentes, Foras

famem, intro diuitias & sanitatem. s. Vtinam &
ille mos apud nos duraret, sed iam plus æquo de-

tineo te. 1. Minimè gentium, si quid aliud vis, di-
cito, omnia sedulò exequar. SEB. Parentibus nar-

ra, me in literis semper gnauius viuere. Alioqui
si rescirèt me aliquādo ineptire, ne numulo qui-

dem auxiliares manus porrigerent. Sacerdotium
fatis amplum mihi impetrarunt: si eò eruditionis

progredi possem. quò sacrificio celebrando suffi-
cerem, in cælo essem. IOHANN. Bellè narras: sed

quì quæso sacrificio celebrando par esse potes, si
verba nec quidem intellecta Deo obmurmuras?

SEB. Non solus ego in eo ludo sum: multi in eas-
dem anfas inciderunt. IOHANN. Sed errantium

multitudo, non facit errori patrocinium. SEB.

Ego non manum verterim, modò numos mihi venari possim. I. In Remboth, vt audio, hominũ genus degenerare vis, quòd pietatem ipsam ne pili quidem faciebat, in cute curanda plus æquo operans. s. Sed ego te itineri accinctum distringo. vale igitur, & fausto omine patriam adeas, lætiori ad nos recurras. I. Et tu interim vale. si qua fortuna tibi benignius arriserit, fac mei memoria non pectore effluat tuo. s. Hac ego te cura leuo: nam quĩ possem tam dulcis congerronis nõ meminisse. I. Vale igitur.

BARTHOLOMAEVS ET PETRVS

De tempore æstivali colloquuntur.

QUID ita ciulas ò Bartholomæ? **BARTH.** Cur non ciularem, vel sanguine, vt dicitur, flerem? scriba domi est, qui subinde me virgis cædere, egregius flagrio, solet, nisi ad satietatem vsque cibos illi subministrauerim.

PETRVS. Ego non huius illud desale emptum mancipium facerem, si cibum adusque clamando emendicatum illi ipsi suppeditare deberem. **BAR.** Nihil grauarer, si æstiuum tempus nobis incumberet: sed his hybernis mensibus mirũ est quantò negotio cibus emendicandus est. Nõ raro ad octauæ horæ signum ad ciuium ædes assidere cogor, vt cartunculæ portionem prærandam extorqueam. **P.** Solent ciues alioqui pueros subornare, qui quotidie certis cantilenis proforibus cantillent, inde pecuniarum messem vel multo vberrimam demetentes. **BARTHOL.** Concentores quos vocant, quicquid est pecuniarum veluti bolum è faucibus præripiūt. Ego NONNVVS

in morem eadem cantilena ciuium aures enecare
 soleo, vnde rarò triuncium lucrifacio. PET. Cur
 & tu non musicam artem addiscis? BAR. Non
 ex omni ligno fit Mercurius : non omnes omni-
 bus artibus appositi sumus. P. Nō tam Apollinis
 oraculum , quàm hoc verbum verum est, sed ta-
 men solent ciues quosdam adolescentes vulgari-
 bus cantilenis subornare. B. Quid hoc est ? Ex v-
 na septimana vix semissem reliquam facio. P. Sed
 tamen ad eum modum increfcet cumulus Hesio-
 dius. BAR. Sed scribe nescio quas nugas agit. Me
 focordiuorem esse ait, quàm vt numulum domum
 adferam. P. Si tam suis, vt fertur, moribus homo
 est, cur non illum missum facis? BAR. Tum si ci-
 baria domum attulero , non igniculus suppetit,
 quo recalfaciam. PET. Quantò pretio agere in
 scholis hyberno tempore datur? BAR. Sex ar-
 genteis numis. Nam cantori ipsi in ipsis diuē Ca-
 tharinę feriis, argenteum numum suppeditamus,
 & singulis tribus hebdomadis numum antiquū
 damus, & nescio quæ alia à nobis exiguntur. Tū
 annua vectigalia pro diuersoriis dependere cogi-
 mur. PE. Pro hominum fidem , mihi nulla pecu-
 nia tam iniquè postulari videtur, quàm quæ pro
 diuersoriis exigitur. Malè illi sit, qui hunc cēsū
 primus instituit, nudo vestimenta detrahare vo-
 luit. BAR. Emori citius videas, quàm vt vel o-
 bulum in ea pecunia remittant: tam è flamma, fat
 scio, pecuniam peterent. PET. Et vobis olim, li-
 gnis vendendis, pecunia impendenda erat, sed ci-
 ues pleriq; nos hac pecunia leuarūt. Vnde quoti-
 die canticum, quod Salue vocant, in templo de-

tonare cogimur. **BAR.** Sed frigore nullo tangimini: calidum enim semper vaporarium est in quo frigora discutere potestis: & crede mihi in longè meliore viuis sorte, quàm ego. **PETR.** Verissimum est quod Horatius dixit, Optat ephippia bos piger, optat arare caballus: hoc est, nemo sua contentus sorte est, semper aliorum sortem magis admiramur. **BAR.** Nescis profectò, nescis quantis negotiorum labyrinthis immergar. Hospes meus subinde proscenium peragere solet, & ad intempestam vsque noctem somnum protraho. Nec vesperi ullius libri inspiciundi copia datur: ceruisia semper afferenda est. **PET.** Et mihi ad octauæ horæ signum vicatim ἀνακαίνεω cursitandum est, vt vel iusculum mihi parem. Tu autem opiparis quotidie cibis ventriculum exatias. **BAR.** Mallem ego tenius victitare, quàm cibi gratia studiorum iacturam facere. **PETR.** Qualem ego fortunam nactus sim, ignoro: nisi ego me olim ex illis fortunæ tumultibus extricaturum sperarem, malis illis seu tempestate afflictus conciderem. **BAR.** Has nugas missas faciamus. Sed scis quid crastino die laboris in humeros nostros resideat? **PE.** Quidam? **BAR.** Nobis prima luce è lecto surgendum est, ad diuæ virginis sacrificium canendum. Tum cantilenæ in Christi natali canendæ non parum temporis exigunt, & nescio quæ alia laborum illas exhaurienda est. **PETR.** Dabit his Deus quoque finem: quippiam iam pietati dandum est: vt enim in sacris sementem feceris, ita & metes. **CHRIST.** iam aduentus

à nobis, obuiis, vt fertur, manibus expectatur: omnibus nobis elaborandum est, quò sese in nostram mentem per gratiæ suæ charismata diffundat, & nobis gratiam ad mensuram det, quemadmodum olim à concionatore non indocto accepit. **BAR.** Bellè narras. Quare quicquid est frigoris, quicquid est tædii, lubenter decoquemus. **P.** Ego quidem nullum reformidabo laborem. **BAR.** Quare mutuò in acie certabimus.

DE EPIPHANIAS FERIIS THOMAS
& *Sebastianus confabulantur.*

DEVS auspicatum tibi conferat annum. **TH.** Et tibi det vt omnia alba contingant. **SEB.** Quid verò mihi pro xeniolo vel strenula mittes? **THOM.** Quid tibi mittam cum nec obulus ad emendos panes suppetat, quo latrantem stomachum exatiam? **SEBASTIAN.** Ego vel Calabri hospitis munera boni consulam. **TH.** Ego arbitror patrem breui aduolaturum: quod si aduenerit, omnia in portu erunt: & ne asymbolus apud te sim, curabo. **SEB.** Non soleo lubenter spem pretio emere. **THOM.** Si expectare non vis, præuerrere Hebrum potes. Vnde quæso misfitandorum munerum ratio apud Christianos radices egit? **SEB.** Tute lepus es, & pulpamētum quæris. **THOM.** Ego quantum ab aliis habeo, referam: arbitror primùm illis xeniolis homines sese mutua salute impertire, veluti aggratulari, quòd Dei benignitate incolumes, totius anni spatia emensi sint. Vel quòd propiùs vero est, quia

illis feriis tres Magi mystici quibúsdam muneribus CHRISTVM regendem eriti sunt. Sic Christiani in Christianæ charitatis symbolum, apophoretis mutuò amicitiam iungunt. SEBAST. Non à veritate abhorrent quæ edisseris: Sed Circuncisionis feriæ cur quæso ab Ecclesia institutæ sunt? THOM. Non in Theologorum harena vnquam exercitatus sum: sed tamen quæ ab aliis audiui, recensebo. Circuncisionis feriæ propterea peraguntur, vt quemadmodum CHRIS TVS in præputii carne amputatus est, sic & nos ab affectibus amputemur: exesas ipsarum volúptatum carnes excidentes, ne animæ lepram adferant. Ita enim quidam dicebat Hieronymum illum sacrum, in libro de Vera circuncisione, disputare. SEBASTIANVS. Quandoquidem in Theologorum campo iam congressus es, Epiphania vnde nomen promeruit? THOMAS. Quanquam hæc à nostra professione parerga sunt, & quasi extra oleas, vt dicitur: tamen quæ à præceptore olim prælegente excepi, in sinum tuum infundam, ἐπιφάνια dicta, ἀπὸ τοῦ ἐπιφαίνομαι, hoc est appareo: nempe quòd tunc CHRIS TVS Magis ipsis nostra indutus carne apparuerit. Nec verò Magos accipies Maleficos quosdam fuisse, vt Augustinus vult, sed sapientiæ studiis deditos, & syderum cursus peritos ex foelicissima Arabia prodiisse, in quo ex auro & argento vasa, lectos, tripodes facere consueuerant: quæ de re præceptor noster Picum Franciscum in libro Prænotionum adducebat. Iam habes vno, vt dicitur, verbo quod à me petisti.

SEBAS T. Et iam ad vespararum p r ecum sacrificium eundum est, si non plagas lucrificare volumus.

P H I L I P P V S E T M E L C H I O R

De festis Bacchanalibus colloquuntur.

M E L C H I O R.

FEST A iam Dionisii appetunt, quo mihi nil gratius obtingere posset. P H I L I P P. Quid tum? M E L C H I O R. Quoniam ad satietatem, usque, me omni ciborum genere explebo. P H I L I P P. Sed posthac in quadragesima tempore fortiter esuriturus. M E L C H. Ut ut res cadat, satis beatus videor, si semel atque iterum ventriculum distendero. P H I L I P P. Quò autem te profers? M E L C H. Rectà ad forum eo, ollas empturus in quas victum capiam. P H I L. Emere soles olla Punica, ut opinor, fide. M E L C H. Non nisi arte Pelasga figulos ludere possum, non cesso planum agere. P H I L. Quid si arripereris? M E L C H. Pedes mihi remedio sunt. P H I L. Præceptor remissionem à studiis, ut audio, ad tres dies dedit. M E L C. Si tres addidero, nihil, ut spero, damni afferet. P H I L. Ego certè octo dies mihi ad hæc festa sumam necessum est, si modò tempori, ut dicitur, seruiendum est. M E L C H. Næ tu mecum vehementer sentis: sed tamen ita Baccho indulgebimus, ne à

Mufarum aris recedere videamur. PH. Sed heus tu, curnam Baccho has serias consecrarunt? ME. Nempe, quòd his diebus nemo non Anticyra egeat, nemo non infania corripitur. PH. Et Baccho cornua cur affingunt? MEL. Quippe quòd olim poculorum vice cornua fuerint. P. Iam satis teneo. Tu vale.

NICOLAUS ET IOHANNES

De rerum salutatione colloquuntur.

ECQV ID portas mi Nicolae? NIC. Cantharum ceruifiæ Neupergenſis domino meo, ex ciuium, vt vocant, cellario affero. IOHA. Mi Nicolae, perquam velim formulam quãdam ceruifiæ consecrandæ præscriberes. Herus meus indies negotium mihi facessit, quòd rusticè ceruifiã consecrè, nec ipse me melius edocere potest. N. Non credis mihi, quàm agrè liceat Latinum sermonem ad vernaculum illum accommodare: sed tamen quantum ex meo præceptore audiui, in sinum tuum effundam. Cum ergo ceruifiã consecrare vis, dicere potes, Ceruifiã vobis saluti sit. Ceruifiã vobis commodo sit. Ceruifiã Deus sua bonitate consecret, nequid noxii vobis ingeratur. I. Iam rem teneo, qua autem ratione ab aliquo salutatus respondere soles? N. Si saluator, Salue mi amice: respondere soleo, Et tu itidem salue. Cum saluator, Saluus sis respondeo, Et tu saluus sis. I. Bene se res habet, omnia teneo: sed cum mane aliquem accedis, quã salutatione cū

dignari soles? N. Dicere soleo, Bonum mane, Bona dies. Cùm in meridie aliquem adeo. dicere solitus sum, Plurimum salue, vel saluete, Salua sit tua humanitas præceptor mi amantissime. Cum verò ab eo, dicere in more habeo, Viue & vale: vel viuat & valeat faustiter tua vel vestra humanitas. I. Sed quo, quæso, modo efferre velis, Bibite bonum Iohannis? N I C O L. Haud scio an oratio latina, ad id genus locutiones vernaculas aspirare possit: dicere tamen vellem, Bibite postremò nobiscum, nomine Iohannis: nam ne vllus quidam fons in itinere occurrat. IOANN. Bene se res habet, gratias tibi habeo: aliquādo curabo ne a symbolo apud te sim. Sed heus tu, vnus est scrupulus, qui me non rarò malè habet: Cum somnum capere vis, qua, quæso, salutatione abire soles? N. Dicere soleo, Ego somnum capeſſere volo, vos quoque quando libitum est, quieti vos tradite. Vel alio orationis habitu efferre potes, Deus vobis omnibus noctem tranquillā impertiat, vel, Quiescite foeliciter, Quietem capite suauiter. I. Omnia in portu sunt. iam vale foeliciter. N. Et tu vale.

BARTHOLOMEVS ET MATTHAEVS

De variis rebus colloquuntur.

PRO S I N T tibi balneæ mi Bartholomæe. BAR. Et tibi omnia profint. MA. Balneæ vt tibi arri-
dēt? B. Si mihi adeò arrisſſent, diutiùs inibi moram nexuiſſem. MA T. Scis quid rerum no-

uarum Africa apud me produxerit? BAR. Modò omnia dextera sint, noua non illubenter audio. M. Et ludus literariùs tibi scopis verrèd⁹ est.

BARTHO. Dii boni, ànne hoc nouum? hoc negotii mihi datum esse non clam me fuit. MATT.

Scopas vbi compares, nostin? BARTHO. Apud

famulum furnarium. MATT. Aliud autem audi-

re vis? BART. Si tam bullatas nugas expromere

vis, taceas malim. Miror qui tam Hiberiis nugas

nos onerare possis. MAT. Putabam me posse ti-

bi timorem incutere, si rem paulò atrocius ador-

narem. BARTHOLOM. Quid rerum est ediffere,

παύσαι λεπτολογῶν, vt Græcè dicam. MATTH. Cu-

biculum nostrum quoque tibi scopis expurgan-

dum est, sordes ad carnificinam exportes neces-

sium est: tenui potu mendicando occuperis opor-

tet. & nescio quæ alia laborù ilias tibi hodie ex-

haurienda est. BAR. Ecque malum, infelicitas est:

miror hodie tantam laborum sarcinam in hume-

ros residere: per integram hebdomadam vel Epi-

cureo deo otiosior fui, & hodie nihil non laborù

mihi obeundum est. M. ἰφύμι καὶ ἰύχιν παρσσαν ἐν πρίσῃ

hoc est, bona verba quæso, & fortunam præ-

sentem boni consule. BARTH. Ecquid incommo-

di tibi accrescere posset, si me mutua opera iuua-

res, & meam operam in rebus tuis sedulò expertu-

rus? MA. Quidni? mori tecum vellem, tantù ab-

est; vt non in hac re auxiliares porrigam manus.

BA. Sed hinc abeundi tempus: tantù vide ne post

festum, vt dicitur appropereamus. MAR. Quid?

vix secundæ horæ signum tactum est. BAR. Si

adhuc tam maturum est, domum abibo: ius quod

heri vesperi reli qui feci, ventriculo donabo: tandem tua opera adiutus, dicto citius quicquid est laboris expediam. M E L C. Tu modò iam ne diu moras nece.

M A R C V S E T P E T R V S

De eleemosynis colloquuntur.

VT VALES Petre? P E T R. Maceratam viuo, vitam, sed tamen incolumem & inconcusam. M A R C. Quot eleemosynas hodie emendicatus est? P E T R. Vix vnã aut alteram. Nam nescio quo pacto ciues omnes fame contabescere volunt. M A R C. Non calles, audio, qua via eleemosynarum vindemiam facere possis: non oportet statim à foribus pedem moueas: si importunius tibi obgannierint, vrgendi sunt: & si crebrò iacias, Venerem iacies, vt in prouerbio est. P E T R. Quid? non rarò me lapidibus minatur, nisi è limine discessero. M A R. locantur tecum ego perstarem, visurus quorsum res abiret. P. Ego posthac me tibi comitem in emendicando pane adiungam: alioqui ante diẽ, sat scio, fame mortem oppetam necessum est. M. Quidni? Ego omnibus machinis, tuæ paupertatule obuiam ire volo. Non vides quo pacto soleam mulieres illas cadauerosas à foribus arcere, & solus prædæ inhiare? P. Bene se res habet. Nò vllus me à latere tuo arcebit. Iam autem valeas

IOSEPHVS ET GEORGIVS

De ratione studendi colloquuntur.

IOSEPH.

SALVE plurimum mi Georgi. **GEORG.** Et tu salve, quò te profers? **IOSEPH.** A præceptore domum eo. **GEORG.** Sub quo tu præceptore stipendia literarum facis? **IOSEPH.** Sub homine non vulgariter docto. **GEORG.** Quanam ipse in te erudiendo via vititur? **IOS.** Sub tempus antelucanum & Græca & Latina declinatione exercet. Et logicis quoque & *suæ* me instruit, quo modo argumentorum panoplian comparare possim. Nugas quasdam tenues ad Macariam, vt dicitur, mittit. Nam plerosque refert eam tradere logicam, quam prius quàm addiscamus, obliuio quædã obrepat: quæadmodum de Strepsiade Comicus quidam scripsit. **G.** O te fœlicem cui talis obtigit præceptor. **IOS.** Tum tempore pomeridiano Grammaticâ Philippi Melanchthonis iuuenis, vt ego audio: in utraq; lingua ex æquo suspiciendi, prælegit: subinde electas auctorum Græcorum sententias, & chrias quasdam veluti coronides adiungens, quibus velut melle prælito, præceptionum absinthium edulcat. **G.** Ni planè lapis sis, doctus euadas oportet. **I.** Tum quò cum literis literatis Christum ipsum imbibamus, Erasmi Roterodami Enchiridion prælegit, ex quo veram pietatem cum eloquentia condiscere possumus. **IOS.** Et quis non sub tali præceptore saperet? **G.** Tum

subinde methematis exercere solet, thema quodam exponens, & tractandi ductum præscribens. Non rarò declamationibus me exercet: breuiter mihi explicans, quæ in procæmio conciliandi ratio, quæ narrandi lux, quanta in diuidendo prudentia habenda sit, quàm subtilis & crebra argumētatio, quibus viribus inspiret, & vt summam dicam, quicquid ad orationis artificium requiri solet. JOSEPH. En ista tua oratione in alienum, vt dicitur, mundum tralatus videor, tam noua instituenti ratio mihi occurrit. Chamæleōta, vt audio, agit præceptor tuus. GEORG. πληροῦν πάντων, vt Comicus quidam dixit. Quapropter variis rebus animum exercere solet, ne eadem per eadem audiendo retundatur. Quis enim præceptorem ferat non nisi cupressum simulatē? I. Quibus aliis rebus vacare cogeris? G. Subinde & Græcæ & Romanæ epistolæ mihi conscribendæ sunt. In dies aliquid in memoriam reponendum, ne memoriæ thesaurus negligatur. I. Hoc ipso, vt dicitur, temporis puncto à meo præceptore desciscam: atque in tuam scholam, seu literarum militiam, nomen dabo. G. Sat scio, intra vnus anni spatium plus promouebere, quàm si alioqui in aliis σχολαστικαῖς ad sex aut amplius annos computrescas: plerique enim præceptores, multo indoctiores discipulos reddere solent quàm acceperunt. IO. Tuo consilio nihil mihi prius erit: posthac ego maiore beneuolētia te mihi obstringam, quàm hactenus deuinxī. Non putaui enim te adolescentem esse tam raro ingenio. G. Quo sim ingenio nescio: hoc certè de me polliceri au-

sim, me nō obscurè videre posse quid distent æra lupinis, & quàm Corydus in aliarum auiū numero rusticè obstrepat. tu modò ne amicū ad desperationem conuerte. Commodius poteris initio mederi, quàm fini. Ætas iuuenilis in quēcunque habitum sequax est. Ætas verò decrepita, mirum est, quàm intractabilis sit: quàm saluam illam primam, quam olim imbibit, semper reddat. Vnde Parœmiacos est sermo, Senis mutare linguam difficile est, & Quia senex est psittacus, ferulam negligit. 1. Tu pol puer es præcoci sapientia. Catonem aliquem iam me audire putauī, non Adonidem, quendam puerum. c. *παῦσαι ληρῶν* (vt Græcè tecum loquar) quòd animo tuo descuiisti, non in hyperberetæa vsque profer. 1. Iam eo. Tu interim vale.

GASPAR ET BALTASAR

de repetendis lectionibus confabulantur.

ECQVID agis Gaspar? G. Qua via lectionibus iam repetendis vteris? BALT. Primò solitus sum vulgarem accommodare rationē, tum ad grammatices coticulam omnia exigere, inuentionis acumē expendere, omniū vocularum sitū subducta ratione ad calculum vocare. Tādē, si quod nouè vel prisce dictū occurrerit, in nidos ad id paratos conuehere, siquæ *παροιμία* siquæ sentētia insignis, stellis vt dicitur notare soleo: & ea quæ insigniora vidētur, in memoriæ thesaurū

deponere: subinde à lectione surgens, & animo meo vtcunque voluens quæ legi. Nec deest enchiridion, in quod, quicquid est illarum opum, ceu promptuarium, repono. Et ea viatédum est τῶν ἁπλῶν πινδόντων, id est, properanti his ditescere opibus. GASP. Næ ego homo sum vel Morrycho stultior, qui talium rerum omnem curam abieci, alia super alia legens: nec animum aduertí, quàm omnem operam luderem. Sed verissimum illud in me ipso experior, qui semper domi veluti in vmbra sese continet, nec in hominum frequentiam progreditur, puerum animalé agere. Non rarò demiratus sum, me ne pilo quidem doctiorem euadere, nullum omnino progressum in me experiri, & iam veluti Epimetheus ille, post factum prudétiam solidiorem sumo. B. Nihil omnino posthabitu est: tantò grauius in literas bonas incumbere, quantò serius eas verè adamare cœpisti. Imitare viatores ipsos, qui dum mane in diem vsq; somnum protaxerunt, quàm possunt celerrimè iter carpūt, tarditatem celeritate resarcientes, & plerunque citius eò quò volūt pertinent, quàm illi qui prima luce iter ingressi sunt. G. Non ignoro nullam addiscendum feram ætatem esse: sed tamen istud tuum studium ego in lucro ponerem. B. Serere ne dubita, non paruus in literis prouentus tibi proueniet. GASP. Faciam vt iubes, nihil non acturus, quo te aut æquè, aut superem.

VVENCESLAVS ET HERMANNVS

de coëmendis libris colloquuntur.

Quos tu putas libros mihi parem? H E R. Ciceronis velim libros, & Terentii Comœdias coëmeres: ex illis enim solidam eloquentiam haurire posses. V V E N C E S L. Qui hoc fit? Ego non satis intelligo. H E. Paucis aduerte, docebo. Ciceronis oratio & elegans & pura est. Terētius purus, tersus, quotidiano nostro sermoni proximus, & haud scio an citra balbutiem, quicquid in linguam venerit, garrere possis, nisi Terentii comœdias in manibus triueris. Nec verò meopte Marte hæc dico: præceptoris mei iudicium est, quod ego hætenus non infrugiferum expertus sum. v. Et iam bibliopolam accedam, illos libros coempturus. H. Exemplaria Terentii varia sunt. Melchior Lottherus Chalcographus in Lypsia prini nominis, Terētium typis excudit vnâ cum præfatione Philippi Melächthonis, iuuenis præter ætatem eruditi. Et Frobenius calcographus optimis quibûsque libris imprimendis omnium diligentissimus, in paruas paginas Terentiû congestit. Tu eme exemplar quodcunque collubitum est. Ciceronis autem exemplaria apud Valentinum Schumanum, siue Græcè appellare ma uis, Hypodymandron chalcographum in Lipsia operę infatigabilis reperies. v. Sat habeo. Tu vale.

F I N I S.

99 95 1564

715.5

7

1. The first part of the paper is devoted to a general discussion of the problem of the existence of a solution of the system of equations (1) for arbitrary values of the parameters α and β .

2. In the second part we consider the case of a solution of the system of equations (1) for arbitrary values of the parameters α and β .

I have been thinking of you very much lately
 and wondering how you are getting on.
 I hope you are well and happy.
 I have been very busy lately
 but I will write to you again soon.
 Love,
 Alice

Wm. L. G. 1880



